

Wapadrant

Feesblad

40
jaar



28 Mei 1983 - 2023

Vir 40 jaar al dra die Here ons. Hy bederf ons met oorvloedige seëninge! Maar: nooit aan ons die eer nie, maar aan ons Here alleen!
Soli Deo gloria!



40 JAAR

SIMBOLIEK



Die getal 40 het sterk simboliek in die Bybel – dit kom gereeld voor. 40 Dae en nagte was die duur van die sondvloed, maar ook die tydperk wat Elia in die woestyn deurgebring het en hoe lank Jesus in die woestyn deurgebring het voordat Hy versoek is deur die satan.

40 Jaar is hoe lank Israel in die woestyn geswerf het. Moses se voorbereiding in God se diens het 2x40 jaar geneem. Vir 40 jaar is hy onderrig en opgevoed in die huis van Farao en daarna is hy vir nog 40 jaar in die woestyn deur die Here voorberei.

Wapadrant Gemeente is ook gelouter, gevorm, voorberei en gereed gemaak om die stad te bou.

Die gemeente se veertigste verjaarsdag is egter nie die eindstreep nie – die wedloop is nie klaar nie. Ons het nog baie werk om in sy koninkryk te doen. Ons is almal saam op God se pad – waar Hy ons ook al heen lei.

Ons gemeenteverjaarsdag val in Mei-maand, saam met Pinkster: 40 dae na die opstanding van ons Here Jesus is die Heilige Gees uitgestort oor die kerk. Dis die Heilige Gees wat ons vermaan, herinner, lei, dra, troos en krag gee om ons roeping te kan uitleef: om hier waar die Here ons geplaas het die stad te restoureer en op te bou saam met Hom: om sy Naam groot te maak: om te wys dat Hy regeer!

~dr Rassie Smit



Oorsig oor die ontstaan



Vanaf 1970 het die ooste en suide van Pretoria vinnig begin uitbrei met voorstede soos Faerie Glen, Garsfontein, Moreletapark, Constantiapark, Kloofsig, Wapadrand, Silverlakes en ander gebiede. Op daardie stadium was daar vier Gereformeerde kerke in die ooste van Pretoria, naamlik Brooklyn, Silverton, Alkantrant en Meyerspark.

Tydens 'n sitting van Klassis Suidelike Pretoria (eers later sou ons deel word van Klassis Oostelike Pretoria) aan die begin van 1980, het die deputate, na die nodige ondersoek, gerapporteer dat die toekomstige stadsbeplanning voorsiening maak vir 'n verdere 60 000 woonerwe. Ongeveer 10% behoort deur Gereformeerde kerkliedmate aangekoop en ontwikkel te word - dus ongeveer 6 000 nuwe gesinne.

GK Alkantrant het eerste die druk begin voel om af te stig, omdat die kerkgebou nie meer die aantal lidmate in een erediens kon akkommodeer nie. 'n Gemeente van 450 belydende lidmate was destyds beskou as die algemene norm vir 'n gemeente om goed te kan funksioneer.

Teen die einde 1982 besluit die GK Alkantrant toe op afstigting. Die volgende woongebiede word aangewys vir die vorming van 'n nuwe gemeente: Garsfontein, Faerie Glen, Wapadrand en Moreletapark. Die nuwe gemeente sou Gereformeerde Kerk Wapadrand, afgekort WPR, heet, omdat die nuwe gemeentegrens weerskante van die Wapadrand- en Bronbergrante geleë is. Die naam is voorgestel deur dr. AJ van Rooy met die spesifieke klem op die "t" aan die einde van die naam, en nie 'n "d" nie.


Klassis Suidelike Pretoria het in April 1983 goedkeuring gegee vir die stigting van 'n nuwe gemeente. Gereformeerde Kerk Wapadrand is met 'n gemeentevergadering op 28 Mei 1983, tydens die oggenderediens te GK Alkantrant, gestig. Die ouderlinge en diakens wat by GK Alkantrant gedien het, het ontslag ontvang en is aan die einde van die erediens as die eerste kerkraad (ouderlinge) met diakens van WPR bevestig. Dr. A. le Roux du Plooy, die predikant van GK Alkantrant, is ook aangewys as konsulent vir WPR.



● Gemeentepiekniek saam met ds Kotie de Jager

Tydens die eerste vergadering van die ampsdraers van WPR is besluit om 'n eie predikant te beroep. Ook is besluit om vir (eie) erediensbyeenkomste voorlopig die kerkgebou met GK Alkantrant te deel, totdat 'n beter reëling getref kon word. GK Alkantrant het ook 'n bruidskat van R120 000 aan WPR geskenk om as 'n finansiële wegspring te dien. Met die geld is 'n pastorie in Bronxstraat, Faerie Glen, gekoop. Die ontwikkelaar, United Bougenootskap, van die Mooigeleë Aftree-Oord, was ook so goed om die westelike deel, nagenoeg 6 000 vierkante meter, aan WPR te skenk vir die oprigting van 'n kerkgebou. Hierdie gebaar dien ook as lokmiddel om lidmate/gelowiges te oorreed om in die aangrensende Mooigeleë Aftree-Oord 'n aftreehuis te koop.

WPR was skaars aan die gang toe die GK Waterkloofrand vir WPR nader om Moreletapark-woongebied af te staan vir die stigting van nog 'n nuwe gemeente in die ooste wat GK Rietvallei sou heet. Hierdie gemeente is gevorm uit die woongebiede Kloofsig, Elarduspark, Monumentpark, Moreletapark,



“
Alkantrant het ook
'n bruidskat van
R120 000 aan WPR
geskenk om as
'n finansiële
wegen spring te dien.

Constantiapark, asook die suidelike dele van die Garsfonteinweg-verlenging tot by die R25 (Bronkhorstspruit-/Bapsfontein-pad).

Die grense van WPR-gemeente is uitgestippel as Garsfonteinweg in die suide, tot by die R25 (Bronkhorstspruit/Bapsfonteinpad) in die ooste en vandaar terug met Lynnwoodwegverlenging tot by Louis Botharylaan (nou January Masilela-rylaan). WPR het sowat 100 belydende lidmate aan die nuwe gemeente GK Rietvallei afgestaan.

Deur God se genade groei WPR gemiddeld met nagenoeg 75 belydende en talle dooplidmate per jaar. Die eerste leraar, ds JJ (Kotie) de Jager, bedien WPR vir drie en 'n half jaar (1983-1987) voordat hy 'n beroep na die GK Johannesburg-Sentraal aanvaar. Hy het 'n belangrike bydrae gelewer in die fondamentlegging waarop WPR in die toekoms sou bou. Slegs enkele maande na sy vertrek word dr. NP (Klasie) Heystek in Junie 1987 deur sy swaer, prof. JH (Amie) van Wyk, vanuit die kerkgebou van die GK Brooklyn, in WPR bevestig.

WPR het intussen reeds die gebruik van die saal van die Pro Arte Alphenparkskool (naby Alkantrant se kerkgebou) bekom vir oggendedienste. In die aande is eredienste saam met GK Alkantrant gehou met die predikers wat roteer. Die skoolsaal word vir ongeveer 8 jaar gebruik voor dat WPR 'n eie kerkgebou sou kon betrek. Tans is 94 van die oorspronklike 300 belydende lidmate steeds lidmate van WPR.

Die eerste groot taak wat dr. Klasie Heystek tesame met die boukommissie aangepak het, was om 'n gesikte en bekostigbare terrein vir die oprigting van 'n kerkgebou te vind. Dit was nodig aangesien die perseel wat deur United Bougenootskap geskenk is (direk wes van Mooigeleë Aftree-Oord) nie geskik was vir die oprigting van 'n kerkgebou nie. 'n Gesikte terrein is gevind met die aankoop van hoewe 3, Olympus (4.2 ha), van P. van der Zee ten bedrae van R160 000. Hierdie bedrag is bekom deur die pastorie in Bronxstraat te verkoop vir R160 000. Die pastorie is dus "omgeruil" vir 'n 4.2 ha hoewe, met 'n groot 5 slaapkamerhuis en woonstel daarop. Alles is gesien en verstaan as 'n groot geskenk van ons God.

Die 5-slaapkamerhuis het vir 'n tyd lank as tweede pastorie gedien, terwyl die woonstel opgeknap en vergroot is. Tot nou toe dien die woonstel as kerkkantoor en die huis as lokaal vir voorskoolbediening op Sondae. Hierdie gebeure het aan dr. Klasie die bynaam van "Klasie bouer" besorg aangesien hy in al drie sy vorige gemeentes ook 'n kerkgebou en soms 'n pastorie moes help oprig.

Na 'n derde poging het die munisipaliteit van Pretoria WPR se aansoek goedgekeur om die erf langs Mooigeleë Aftree-Oord te hersoneer met kommersiële regte tot 'n dekking van 60%. Na die hersonering is die grond vinnig verkoop vir R1.4 miljoen. Spoedig hierna is begin met die oprigting van die kerkgebou op die basis van eienaarbouer. Die kerkgebou is opgerig vir R2.33 miljoen. Die balans van die uitstaande bougeld is verkry uit die rente op die verkoopsom, asook bydraes deur lidmate.

KERKRAAD GEREFORMEERDE KERK WAPADRANT

1 Junie 1983



● Eerste kerkraad

Die Boukommisie het uit kundiges van die gemeente bestaan.



Die boukommissie het uit kundiges van die gemeente bestaan, onder andere: dr. Manfried Köster (sameroeper en projekbestuurder), Jan Meijer (argitek), George de Ridder (siviele ingenieur), Sakkie van der Walt en Pedro van der Merwe (elektriese ingenieurs), Louis de Klerk (regsaspekte), Bertus Schoeman (bourekenaar), Erna Köster (notuleerde en boekhouer), Gert Nienaber (bouvoorman) en dr. Klasie Heystek as adviseur. Die instandhouding van die kerkgebou en plaveisel is die laaste klomp jare hoofsaaklik verrig deur Raymond Hugo en sy span.

Die skip van die kerkgebou bied sitplek vir ongeveer 800 lidmate. Met die deure in die voorportaal oopgeskuif, kan nog 200 lidmate op stoele geakkommodeer word. Indien die saal se deure ook oopgeskuif word kan nog 300 lidmate ingepas word. Met die implementering van nuwe tegnologie word die erediens tans na die saal gebeeldsend.

Twee jaar na die ingebriukneming van die kerkgebou was die gemeente skuldvry. Met surplusfondse tot hul beskikking kon dienswerk na buite aangepak word.

Onder meer is twee kerkgeboue in Vendaland help oprig. Verskeie bedieninge binne en buite die gemeente is gevestig en maatskappy(e) sonder winsbejag is gestig (kyk Esmé Daniël se artikel in hierdie Feesblad).

Kort na die voltooiing van die kerkgebou het die Susters die oprig van die dak oor die amfiteater teen ongeveer R100 000 befonds.

Kategeselokale of vergaderkamers is enkele jare later aan die westekant teen ongeveer R450 000 opgerig. Louis Botha (WPR) het as argitek opgetree. Laasgenoemde bouskuld is spoedig gedelg.

Die besonderse doopvont en die twee groot stoele op die preekstoel is deur wyle prof. Hennie Bingle (voormalige rektor van PU vir CHO/NWU) gemaak en gratis aan die gemeente gesenck – 'n uitsonderlike gebaar van toegeneëntheid.



● Prof. Hennie Bingle

Met dankbaarheid teenoor ons Hemelse Vader vir al die seëninge wat die gemeente ervaar het is die kerkgebou op 25 April 1992 in gebruik geneem. Nou het WPR 'n baie bruikbare sentrum vir die koördinering van gemeente-aktiwiteite.

Deur bemiddeling van dr. Klasie is die ou orrel van die Musiek-Konservatorium van PU vir CHO (nou NWU) aangekoop vir nagenoeg R27 500 en teen 'n verdere R100 000 opgeknap en geïnstalleer. In 2021 is die orrel vervang nadat die orrel van die NGK Kemptonpark aangekoop is teen R125 000 en geïnstalleer is teen 'n addisionele R325 000.

Op liturgiese terrein het dr. Klasie hom beywer vir gesamentlike nagmaalgebruik. By verskeie meerder vergaderinge het hy versoek dat nagmaalgebruik in die banke met glasies gevier mag word. Dit het aan dr. Klasie 'n nuwe bynaam "Klasie glasie" besorg. Die gemeente van WPR was van mening dat die tekens van die nagmaal geleë is in die brood en wyn, en nie die beker nie. Die eenheid van die gemeente in Christus word sigbaar vertoon deurdat die gemeente wat almal saam die brood eet en die wyn drink.

'n Rustige atmosfeer vir nagmaal is hierdeur geskep.

Deur die genade is daar op die evangelisasie- en sendingterreine baie bedieninge geloods. Dit het onder andere geleid tot die beroep van wyle prof. Tjaart van der Walt om by die Theological College Mukhanyo (in KwaMhlanya) te help met Grieks en Nuwe Testamentiese vakke. Verder is ds. Petrus (Sloet) Grové beroep as sendeling om in Ficksburg-omgewing, saam met etlike boere daar, uitreikwerk onder die vaandel "Missio Dei" te doen. Daar kan met groot dankbaarheid teruggekyk word hoe die Here beide hierdie aksies geseen het oor die jare. WPR was ook betrokke by sendingaksies in Burundi en Soedan, asook Topia (Training of Pastors in Africa) onder leiding van ds. Johannes Aucamp.

'n Groot seën tot opbou van die gemeente was dat WPR haar sang van ongeveer 1998 met talle skrifgetroue liedere uitgebrei het. Vroeg in 2008 is vroue, nie net as diakens nie, maar ook as ouderlinge in die gemeente bevestig. Wyle Roelien J van Rensburg was die eerste ouderling.



● Doopvont



● Vooraansig van die kerkgebou

Oor die jare het vier seuns uit die gemeente predikante in die GKSA geword, naamlik Renier van der Klasthorst, Chris de Beer, Dreyer Potgieter en Karel Steyn. Hulle dien al vier met groot seën vandag (besonderhede in Almanak GKSA 2023).

Die gemeente is ryklik geseen deur tien predikante wat hier gedien en merkbare veranderinge intern (gemeentebou) en ekstern (uitreik) help vestig het in WPR. Hulle is benewens voorgenome twee: MAF Kruger (1989-1999), T v.d. Walt (1996-2002), JAT van Blerk (2000-2002), JP Kruger 2002-2020), FW Leuschner (2003-2018), PJ Vermeulen (2005-), PJ Grové (2010-) en EJ Smit (2013-). Ons dink terug en sê ook dankie aan die volgende emeritus-predikante wat in WPR diens gedoen het of nog steeds doen: Herman Grobler, Mechiel Venter, Paul Kruger, Gerrie van Wyk en Amie van Wyk.

Kleingroepbediening is in 2003/2004 gevestig om 'n plek te bied waar lidmate kan voel hulle behoort. Kleingroepe gee vir mekaar om, en bied diensplek aan almal. Dit het die wyke vervang.



● *Eerste erediens op hoewe 3, Olympus, buite die pastorie*

“
Die besondere gawes wat die Gees aan vroue gee, het op 'n besondere manier meegewerk tot die opbou van die gemeente.

'n Pastorale Dienssentrum is geskep met Vorster Combrink en Kobus Roux as primêre beraders. Verskeie opboukursusse is aangebied.


'n Bestuursdiensgroep is ook gevestig wat tot 2018 al die diensgroepe se funksionering gekoördineer het. Gesamentlike begrotings is hanteer en opgestel en al die diengroepvoorsitters het saam vergader.

Die Kerkraad se Dagbestuur is in 2011 gevorm. 'n Kerkregister en kantoor het die administrasie baie vergemaklik. Veral die dag-tot-dag sake is hier hanteer en ondersteuning is verleen aan al die klein-, diens- en uitreikgroepe.
Soli Deo Gloria, aan God alleen die eer, vir die 40 jaar se genade.

Hierdie feesblad vervat jare se ryke seëning en ontwikkelings. Verskeie skrywers het kosbare bydraes gelewer.

Jan de Beer
(In medewerking met Gawie Jooste en Klasie Heystek)

Lidmaat getalle



Die gemeente bestaan tans uit 2192 lidmate, waarvan die ouderdomsverspreidingregs aangedui word.

Bykans 60% van die gemeente is jonger as 50 jaar, wat daarop dui dat gesinne, en dan veral gesinne met skoolgaande kinders 'n groot deel van die gemeente uitmaak.

Ouderdom	Aantal	% van totaal
0-10	283	12,9%
11-20	257	11,7%
21-30	189	8,6%
31-40	288	13,1%
41-50	308	14,1%
51-60	257	11,7%
61-70	259	11,8%
71-80	250	11,4%
81-90	88	4,0%
91+	13	0,6%
TOTAAL:	2192	100%

KUNSWERKE

AS DEEL VAN ONS KERKGEBOU

Waarom is kunswerke deel van ons kerkgebou? Wel, die argitektoniese struktuur van kerkgeboue (en ons land het pragtige kerkgeboue) is self kunswerke. Doelmatig en esteties ontwerp om as aanbiddings-, saamkoms- en werkplek vir gelowiges te dien. As sodanig behoort die ontwerp van kerkgeboue prakties en ekonomies te wees, maar ook ons harte op ons goeie, barmhartige, almagtige God Drieënig te rig. Die argitektoniese struktuur as sulks kan 'n groot inpak hê. Dink aan die "arkkerk" (Noag se ark) van die GK Annlin of die "tentkerk" (2 Kor5:1) van GK Lyttelton, of die talle "kruiskerke" regoor ons land. Met WPR se gebou het die argitek, Jan Meijer, probeer om 'n skulp effek te bewerkstellig, waar die gemeente in stilte en afsondering met God kan verkeer. Hy het daarin geslaag deur 'n ietwat skemer atmosfeer binne te skep, met verstekte vensters langs die syekante en agter, langs en bo die preekstoel. Oordeel self hoe geslaagd dit was. Argitek Jan Meijer is in 1992 vir die ontwerp van WPR kerkgebou, benoem vir "ontwerp van die jaar" en het derde geëindig!

Die kerkrAAD met diakens het goedgekeur dat enkele kunswerke ook ingebou behoort te word, met heenwysing na God Drieënig. Die bedoeling was om die gewyde atmosfeer te versterk en die estetika in die gebou te verhoog. So is daar by die hoofingang aan die linkerkant binne 'n muurnis 'n uitbeelding van "die goeie herder met sy skape" met 'n alwyn daarby vir balans en afronding. Dit wys heen na Jesus Christus (Ps23; Joh 10:lev; ea), maar wys ook op ons elkeen om herders vir mekaar te wees (Eseg 34:lev; 1 Pet 5:2).

Suster Ruth Walters het die kunswerk letterlik met 'n bytel en hamer uit 'n dik stuk harde embuiahout gekap. Wil gedoen wees! "Onthou om die hout gereeld met goeie houtolie te smeer", het sy altyd gesê.



Koninkrykstyd



Lydingstyd



Advent & Kersfees







Hemelvaart en Pinkster

Die kunsvensters van kleurglas, in raamwerke van beton, is die skepping van die kunstenaar Leo Théron. Die groot lang paneel linksagter wys na die Triniteit:



- Die blom met die drie wit blare dui die reinheid en eenheid van die Vader, Seun en Heilige Gees aan.
- Die wit duif wat na benede vlieg is 'n simbool van die komst van God die Gees na die kerk op Pinkster.
- Die omgekeerde hand sien op die voedende, beskermende en versorgende Vaderhand.
- Die vuurvlamme kan 'n heenwysing wees na die brandende braambos of die vuurtonge van Pinkster.
- Visse is 'n ou simbool vir Christus. 'n Vis word in Grieks *ichtus* genoem. Die letters is in volgorde deur die vroeë kerk gebruik om soos volg te bely: *Jesus Christus is die Seun van God*.

Die drie kantventers is ook glas in beton gegiet (kyk hieronder) met ook nagenoeg 2 duim dik gekleurde glasstukke (wat sterk genoeg is vir ons wind en weer).



As ons mooi kyk, sal ons in elk van die drie sypanele heel onder, in goue letters, die twee Grieksewoordjies *éγώ εἰμι* sien. Vertaal: "Ek is". Toe Moses by die brandende braambos na God se naam vra, het Hy geantwoord: "Ek is wat Ek is" (Eks 3:14). In die NT word hierdie woorde in Christus vervul. In ons panele word na drie hiervan verwys: 1. "Ek is die brood van die lewe" (paneel met koringare; Joh 6:35). 2. "Ek is die ware wingerdstok, julle die lote (paneel van die druiwestok; Joh 15:5)). 3. "Ek is die lig vir die wêreld" en "Ek is die blink môrester" (paneel met die sterk wit gedeeltes (lig) en die oggendster; Joh 8:12; Op 22:16).

Onse God is die groot Kunstenaar en ons glo ons kleine kunswerke is waarlik tot Sy eer! (Sien o.a. die boekie van S.S. Smeding. *40 Christelike symbolen*. 1965. Derde druk).

Lacia Vermeulen se prag-kunswerke vorm deel van ons erfenis – daarvoor is ons geweldig dankbaar!



● Ingang by die terrein



● Net links van die kerkgebou se ingang



● Kateder in die kerkgebou

TIEN PREDIKANTE OOR 40 JAAR



● Opening van die deur



● Eregaste by die opening



● Sustersaamtrek



● Kuier in die amfi



● Vooraansig

Nou kyk ons terug oor 40 jaar se geskiedenis en roep in herinnering 10 Geestelike leiers wat hier gedien het en van hulle is nog steeds betrokke. Hul verskyn in volgorde van beroeping.

Kotie de Jager

3 jaar

Gesinsvorming was aan die orde van die dag. 'n Groot aantal verbondskindertjies is vir jong egsare in die gemeente gebore en elke maand is hierdie babatjies gedoop. Kategese het Vrydagmiddae by Laerskool Garsfontein plaasgevind en het feitlik al die klaskamers beset. Vandag is hierdie "kindertjies" veertig jaar oud. Hulle het deel uitgemaak van die snelle groei wat die gemeente deur die jare beleef het.



Die tagtigerjare was gekenmerk deur politieke onrus as gevolg van die grensoorlog. Die stryd teen terroristemagte om die onafhanklikheid van die destydse Suidwes-Afrika het dikwels jong gesinshoofde opgeroep om grensdiens te verrig met die gevolglike ontwrigting vir moeders en kinders. As kapelaan moes ek ook deel uitmaak van die weermag se strategie en het dit geleid tot traumatische ervarings. By geleentheid het ek op die grens bevriend geraak met 'n medekapelaan, ds Tienie Bekker. Ons was albei motorfietsentoesiaste, hy het 'n Kawasaki gehad en ek 'n BMW. Hy het egter in 'n landmynvoorval sy een arm verloor. Hy kon nooit meer motorfiets ry nie. Ek het nou nog die troosbriefies wat my vrou en kinders vir my geskryf het.

Tydens 'n ander periode op die grens het my dienstyd verstryk en om terug te keer huis toe, het 'n groepje jong soldate my op 'n Buffel, 'n landmynbestande voertuig, vergesel na die lughawe. By my aankoms in Pretoria het ek berig ontvang dat die luitenant wat saam met my op die voertuig was, op pad terug na die basis, ernstig beseer is toe die voertuig 'n landmyn afgetrap het en dat hy per helikopter afgevoer is na 1 Militêre Hospitaal in Voortrekkerhoogte. Ek het hom dadelik gaan besoek, net om te ontdek dat sy regterarm ge-amputeer is. Ek het onder tranen van hom afskeid geneem deur sy linkerhand te skud.

Die genade van die HERE het bewerk dat die oorlog in 1987 tot 'n einde gekom het en Suidwes-Afrika, nou Namibië, in 1990 onafhanklikheid verkry het.

Ek het die bediening verlaat maar die behoefté het steeds by my bestaan om op een of ander wyse met dienswerk in God se Koninkryk betrokke te wees. Ek het my toegewy aan verdere studie en het 'n Doktorsgraad verwerf wat my in staat gestel het om klasse aan te bied by 'n Bybelkollege wat studente oplei in Bybelse Berading. Ek is ook geregistreer as Bybelse Berader en kan mense in nood begelei. Op dié wyse kan ek steeds 'n geringe bydrae maak om die krag van die Evangelie te verkondig.

"My bede is dat die troue Verbondsgod die meetsnoere vir Wapadrant in lieflike plekke sal laat val"

Klasie Heystek

18 jaar

WAPADRANT GEMEENTE VIR 40 JAAR ONS MOEDER

Calvyn het gesê: Wie God as Vader het, het die kerk as moeder. Daarmee het hy bedoel: God versorg ons op unieke wyse deur sy kerk. Om hiertoe in staat te wees, ontvang die kerk daagliks 'n magdom gawes van die Vader, in Christus, deur die Heilige Gees. Kom ons staan 'n oomblik stil by ons moeder se 40ste verjaarsdag en verwonder ons oor hoe God WPR soos 'n moeder gebruik om ons te versorg en toe te rus vir ons dienswerk in sy koninkryk.



Ons noem vandag net twee kosbare skatte wat WPR daagliks van God ontvang en aan ons deurgee.

Die eerste gawe is die WPR-model van kerkwees. Soos moeders doelbewus 'n bepaalde opvoedingsmodel kies vir haar kinders, het WPR ook 'n keuse gemaak. Ons het gekies, soos geleei deur die Gees en Woord, vir die liggaamsmodel van kerkwees. Dit beteken dat elke lidmaat 'n onmisbare plek in die bestaan en funksionering van die kerk het en moet inneem.

WPR bestaan uit gelowige Christene, klein en groot, jonk en oud, wat die verlossing in Christus aangeneem het, en deur Christus, as hul Hoof, geleei en versorg word. Die kerk is dus 'n lewend organisme waar die lidmate nie sonder Christus en sy Gees, maar ook nie sonder mekaar kan lewe nie. Soos ons eie liggaam, is die kerk 'n liggaam waar elke lidmaat 'n besondere plek en werking inneem (1 Kor 12:12-31). Van geboorte af het WPR dit verstaan. Tydens die dienstyd van ons eerste predikant, ds JJ de Jager, is kursusse aangebied oor *Ontdek jou Gawes* en dien mekaar daarmee. Van toe af is al meer klem gelê op die liggaamsmodel van kerkbestaan, waaronder die toevoeging van die Omgee-, Diens-, Uitreik- en Opbougroepe. Hierdie diensgroepe het WPR, as liggaam van Christus, gehelp om optimaal te funksioneer.

Hiernaas het die herder-kudde-model tereg bly voortbestaan, maar die klem het op "sorg vir mekaar in liefde" gevval. Calvyn het daarop gewys dat die dien van mekaar veral drie vrugte lewer: 1. Die liggaammodel maak ons nederig, want ons moet almal van mekaar aanneem en gee, ondanks ons plek in die liggaam. Nie een is hoër of laer as die ander nie. Almal is gelyk, kinders en volwassenes, broeders en susters. 2. Die liggaammodel laat ons geestelik groei, want deur te ontvang én te deel, groei ons saam in kennis, diens en geloof (Rom 1:11,12). 3. Die liggaammodel maak ons baie lief vir mekaar, want om vir mekaar om te gee en te sorg laat die liefde blom en verdiep.

Klasie Heystek

18 jaar



Die tweede gawe is WPR se spiritualiteit.

Van watter spiritualiteit praat ons? Wel, eenvoudig gesê, dit gaan oor WPR se oop wees vir die leiding van die Gees deur die Woord.

Ons moeder het van vroeg af 'n weersin in formalisme gehad. Ons kon nie aanbid, dien, sing, glo, kerkwees, net omdat ander (kerklike vergaderings) dit so bepaal het nie. Nee, die bruisende lewe van gelowig- en kerkwees, het telkens vir nuwe strukture en vorme gevra. Ons is gelei om te verstaan dat ons God-Drieënig oneindig vol en ryk is in Homself en sy diversiteit. Kyk maar net na die skepping of luister na Paulus se gebede vir die Efesiërs (Ef 1:15-23; 3:14-21). Daarom het WPR deur die jare gegroeи in liturgie, liedereskat, nagmaalsvieringe, bedieninge na binne en buite, strukture is aangepas om diens te bevorder, ruimte is geskep vir alle lidmate van beide geslagte en vir ons kinders en jeug. Elkeen moet geleentheid ontvang om optimaal met vreugde te dien. Die koninkryk van God, en nie WPR nie, is in die sentrum van ons bestaan geplaas. Op allerlei wyses is rigting gesoek en gevind om die ryk van God te bevorder.

Daarom dank ons vandag die Vader, die Seun en die Gees wat naas die Bybel, talle geestelike gawes, insig en leiding aan ons moeder WPR geskenk het. Mag ons Here vir WPR verder seën en in waarheid lei tot Sy eer, en tot omvattende heil vir haar kinders. Mag ons Here ook dit vergewe en uitwis wat ons liefdelloos en verkeerd gedoen het.

Klasie Heystek
Emeritus WPR



● Ingebruikneming van die gebou

"Persoonlik dank ek God dat ek nou reeds vir 36 jaar deel kon hê aan hierdie grootse genade en rykdom in WPR!"

Andries Kruger

10 jaar

Om as proponent in Wapadrantgemeente te kom en dan nog in Verwoerdburg-Noord (Centurion) ook te werk, was ek behoorlik in die diepkant ingegooi. Genadiglik was daar bekwame kollegas wat my kon lei en help vorm. Wat 'n voorreg was dit nie om saam met dr Klasie Heystek te kon werk en later nog bekwame persone soos dr Tjaart van der Walt en dr Mechiel Venter nie. Vandag besef ek die waarde van dit wat ek by hulle kon leer, veral by dr Klasie Heystek wat my behoorlik onder sy vlerk geneem het.



Ek was later bang as dr Klasie verlof neem, want elke keer as hy terugkom van verlof het hy nuwe dinge uitgedink wat ons in die gemeente moet probeer. Die preekbespreking na die erediens was vir my as jong dominee erg, maar toe hy kom met die idee dat lidmate voor die diens die vrae vra en jy dit in die prediking moet beantwoord, het ek 'n hele paar jaar ouer geword van stres.

Wapadrant was en is seker vandag nog 'n baie dinamiese gemeente. Om 'n makrogemeente te bestuur en te laat funksioneer moes daar baanbrekerswerk gedoen word, aangesien die Gereformeerde Kerke oor die algemeen nie baie groot gemeentes is nie. Om 'n kerkraadsvergadering met by die 100 ampsdraers te hou, moes aanpassings gemaak word. Nuwe strukture is geskep. Die gemeente is in blokke verdeel en elke predikant het 'n blok bedien. Vir afwisseling het ons dan blokke geruil en dan kry jy sommer weer 'n nuwe gemeente. Die voordeel van 'n makrogemeente is dat die werk verdeel kan word volgens elke predikant se gawes.

Vir my was die jeugbediening besonders. As ek net terugdink aan al die jeugkampe wat ons gehou het en selfs op die kerkterrein gekamp het, buitestorte geprakseer het met die hulp van oom Wim Oudshoorn wat destyds die tuinopsigter was, die deurnagte wat ons by die kerk gehou het. 'n Groot hulp was toe ons vir Gawie Jooste as jeugwerker kon aanstel.




● Kamp op die terrein



● Jeugbediening

Andries Kruger

10 jaar



Ek dink terug aan die nagmaaletes wat ons gehou het saam met die diakens. Om vir ongeveer 500 mense kos te gee was nie maklik nie. Anna het behoorlik die diakens aan die werk gekry met die voorbereiding van die kos in die kerk se kombuis. Ek onthou die skottels vol aartappelslaai wat deurgemeng moes word. Die diakens moes leer om 'n tafeldoek reguit oor te goo en as Anna jou vang dat jy dit skeef oorgooi was jy in die moeilikheid.

Die aangenaamste tye was sekerlik as die karavaangroep (Wapadwiele) gaan kamp het. Die band van gelowiges wat ons daar met mekaar gebou het was 'n wonderlike belewenis. Die saam kuier, die saam braai, huisgodsdiens hou en die erediens op Sondae onder 'n boom, sal my altyd bybly.



● Wapadwiele



● Wapadwiele

Toe ons in Wapadrant kom, het ons die voorreg gehad om buite op 'n plot te kon bly. Die naaste beboude gebied was die Faerie Glen se Pick 'n Pay. Ons erediens is in die skooldaal gehou en die aanderdienste saam met Alkantrantgemeente in hulle kerkgebou. Veral die nagmaal was maar 'n bietjie chaoties as ouers met huilende kinders op die skoolstoep staan terwyl die ander ouers nagmaal gebruik. En daardie tyd was daar baie kindertjies. Ek het geleer om met huilende kindertjies te preek sonder dat dit vir my 'n steurnis was.

Toe begin die kerkbouery. Toe die fondamente van die kerk gelê is, het ons 'n erediens daar op die plot gehou van die stoep van die huis af. Ons het 'n spesiale kollekte vir die fondamente van die kerk gehou en 'n hele R16 000 is opgeneem. Die kerkbouery was 'n belewenis. Ek dink nog Wapadrant het een van die mooiste kerkgeboue wat daar is.

My seun Andries en Helena Aucamp se dogter Margerie het te lekker met hulle skopfietse in die kerkgebou gespeel.



Andries Kruger

10 jaar



Ek onthou nog hoe die hele gemeente kom help het om die kerk skoon te maak toe die bouwerk voltooi is.

Hoe sou ek ooit my voete in die gemeente gevind het sonder die hulp van Helena Aucamp in die kerkkantoor. Sy het gesorg dat ek met my huisbesoek op datum bly deur vir my vooruit afsprake te maak en dat die kerklike administrasie op datum bly. Later het Jean Aucamp bygekom en moes ons aanbouings aan die kerkkantoor maak.

Van my moeilikste, maar ook gelukkigste jare in die bediening was in Wapadrand. Dit was besonderse lidmate met wie ons saamgewerk het. Lidmate wat ons as predikantspaar in ons moeilike tye ook ondersteun het. Toe Anna se ouers oorlede is het ons kinders vir Tom en Winnie Potgieter as 'n nuwe ouma en oupa in die gemeente gekry, met wie ons vandag nog noue bande het.

Ons gesin het ook uitgebrei deur die jare. Al drie ons kinders is getroud. Geziena is met Jacques Swanepoel getroud en sy is 'n apteker in Jan Kempdorp in die Noordkaap. Hulle het 'n seun Juan, ons enigste lieflingskleinkind. Andries is met Riana Labuschagne getroud en hulle woon in Hartbeespoort. Hy is 'n elektroniese ingenieur en werk tans vir Takealot. Kobus is met Grethe Cruywagen getroud en woon in Alberton. Hy is 'n rekenmeester. Ons is baie dankbaar vir die skoonkinders wat ons bygekry het.

Na Wapadrand het ons Springsgemeente vir nege jaar bedien waarna ons die beroep na Alberton gekry het. Ons bedien die gemeente nou vir veertien jaar en sal DV in Januarie 2025 emeriteer.

Dankie Wapadrand, dat ons vandag net met goeie herinneringe kan terugdink aan die tien jaar bedieningstyd wat ons vanaf 28 April 1989, toe ek in die gemeente bevestig is, kon gehad het.

Ds Andries en Anna Kruger



"Ons gee saam met julle aan die Here al die eer vir die 40 jaar wat Hy die gemeente versorg en gedra en vooruit laat gaan het."

Tjaart van der Walt

6 jaar

Die Gereformeerde Kerk Wapadrand (WPR) is in haar 40 jaar se bestaan deur 10 predikante bedien (hul name verskyn elders in hierdie bundel). Van elk van die leraars is 'n herinnering of boodskap ontvang, behalwe van prof. Tjaart en sr Barbie aangesien beide reeds oorlede is. Die redaksie het my daarom versoek om 'n kort herinnering te skryf. Ek verwys graag na al twee persone, omdat beide 'n merkbare invloed in ons midde gelaat het. Hulle was hier vanaf 1996 tot 2002. In 2002 het prof. Tjaart emeritaat aanvaar na mislukte en pynlike voetoperasies wat sy beweging baie gestrem het.

Kort hierna is hul huis in Silver Lakes-landgoed verkoop en het hulle na Potchefstroom verhuis.



Professor Tjaart is vroeg in 1996 deur WPR beroep en kort daarna primêr as dosent in Grieks en Nuwe Testamentiese vakke aan die Mukhanyo Theological College (MTC) bevestig. WPR was een van die ondersteunende kerke wat tot die stigting en uitbou van MTC bygedra het. Ek het verneem dat prof. Tjaart tot 25 klasse per week in die twee velde doseer het. Dis 'n geweldige werkslading, maar was vir hom 'n vreugde, gebore uit sy roeping en gawes. So kon hy hierdie groot diens vir 6 jaar verrig.

Hy was ook behulpsaam in WPR met huisbesoeke (vir 'n kort periode), vergaderinge, preke, wyksbyeenkomste en navorsing deur WPR. So is die eerste rapport oor jeugbediening in WPR deur hom as sameroeper geskryf. Dit is 'n deeglike en lywige stuk werk, wat die jeugbediening in WPR wesentlik beïnvloed het. Daarby was veral sy preke 'n kragtige instrument tot opbou van die gemeente vir haar dienswerk.

'n Volle lewensoorsig van prof. Tjaart is te vind in *In die Skriflig*, Jun/Sept 2011, indien u meer sou wil weet van hierdie "slaaf van Christus", soos hy graag na homself verwys het.



● 'n Sustersaamtrek in 1975 op Grootfontein in Suidwes-Afrika



● Besoek met Tjaart se 84ste verjaarsdag

Tjaart van der Walt

6 jaar



Suster Barbie het van die begin af gesê haar dae van help met onthale en soortgelyke dienswerk is verby. Sy het dit vir dekades gedoen. Nou wil sy voor alles geestelik verder groei saam met ander. Sy het dadelik aangesluit by die Susterbybelstudie-groep en het ons met haar insig en wysheid inspirerend vorentoe gehelp.

Tjaart en Barbie (née Snyman) se seun Johan, is ongeveer in 1991 in 'n motorfietsongeluk in Potchefstroom oorlede, terwyl prof. Tjaart rektor van PU vir CHO/NWU was. Barbie kon Johan se dood nie verwerk kry nie, al het sy hoe hard probeer. Tot op 'n dag dat sy afkom op die klein boekie van wyle ds. Andrew Murray (AM) oor die Heilige Gees. Die titel is aan my onbekend. AM het letterlik honderde boeke geskryf en veral oor die Heilige Gees. In die boekie van AM is sy geleer hoe om die Gees te erken, deur Hom te lewe en deur die Gees as ons Trooster, vertroos te word. Sy is van toe af "meer" deur die Gees vervul en geleei in haar denke en lewe. So sou sy ons ook help tydens Bybelstudies om die werking van die Gees oral raak te sien en te omhels. As ek byvoorbeeld sou preek en nie die geleentheid gebruik het om op die kragtige werking van die Gees te wys nie (waar toepaslik), sou sy my voor die kansel inwag met die woorde: Het jy vandag weer vergeet van die Heilige Gees? Sy het altyd gesê: Die Doppers weet van baie dinge, maar hulle weet nie altyd hoe om met die Heilige Gees in hulle te lewe nie. Waar of nie? Vir haar groot inset sal ons haar altyd dankbaar wees! Sy was een groot vreugde in ons midde.

Klasie Heystek
(in opdrag van die redaksie)



"So onthou
ons hulle
en dank
God
vir hulle."

Theo van Blerk

2 jaar

Geliefdes in die Here, bekend en onbekend:

Baie dankie dat julle aan ons gedink het hier vêr oor die waters. Al was ons bedieningstyd in Wapadrant kort, het ons na 20 jaar nog mooi herinneringe van ons tyd saam met hierdie sigbare liggaam van Christus hier op aarde.

Wat 'n aanpassing was die verskuiwing vir ons van die destydse Ellisras met sy vlaktes en bosveld, plase, kakieklike en grondpaaie, na die stad met alles wat opmekaar is, die besige verkeer, groot huise en komplekse met mure en sekuriteitskodes wat jy moes onthou of ten minste neerskryf as jy gaan huisbesoek doen.



Daar is soveel herinneringe. Die kampery saam met Wapadwiele, die aangename Bybelstudies in die pastorie saam met die vrouens, die omie wat baie beswaard was omdat ek my Dalmatian "Calvyn" genoem het. Een storie wat uitstaan is ons kinders wat 'n speel-speel "drankwinkel" op Wapadrant se grasperk gemaak het een middag. Wat 'n gesig met al die bottels. Hulle het ons kom roep om ons te wys. En toe ek vir hulle vra waar hulle al die bottels gekry het, kom dit alles uit Wapadrant se asblikke. Dit was darem na 'n funksie, maar ons lag nou nog daaroor. Ons dink aan ure sonder water en krag toe hulle rondom Wapadrant begin bou het. Maar ek verstaan dit is deesdae iets waaraan julle almal al gewoond is.

Ons dink met liefde aan Helena wat ons so baie gehelp het en aan Winnie wat altyd so mooi met ons kinders was. Hoe sal ons ooit vergeet hoe Klasie nie 'n noot kon hou nie, maar altyd uit volle bors gesing het. Wat 'n voorbeeld van lofsang aan die Here! En dan onthou ek hoe Hantie Fourie se been in een aanddiens van haar rolstoel losgeskiet het dat 'n diaken oor haar reguit been gestruikel het.



● Verwelkoming van die van Blerk-gesin



● Maartin heel links, sy vrou Jacqie, Rina-Mari, Theo, Lidia, Ferdinand en sy vrou met die kleinkinders.

Theo van Blerk

2 jaar



Die 2 jaar in Wapadrant was geweldig besig. Tong in die kies kan ek seker maar sê dat ek nog nooit voorheen en nog nooit weer daarna meer vergaderings gehad het as gedurende die tyd in Wapadrant nie. Veral met Willem Pelser toe as voorsitter van die Beplanningskomitee. Maar wat 'n tyd. Ons het in 'n baie kort rukkie soveel liefde ervaar en lewenslange vriende gemaak.

En skielik, uit die bloute, kom 'n geleentheid om in die VSA te gaan kuier en sommer terloops vir 'n gemeentetjie van 30 mense te preek. 'n Gemeente wat toe al vir drie jaar vakant was. 'n Gemeente wat bykans 200 jaar oud was, en op daai stadium 'n Gereformeerde predikant gesoek het. Ek het gedink, wat 'n geleentheid. Ek gaan dit aangryp. Ten minste sou ek kon sê, ek het in Amerika gepreek. Ek het preke vertaal. Ek het nie eens 'n Engelse Bybel besit nie. By alles wou ek bietjie wegkom en gaan rus. Maar die Here het ander planne gehad met my en ons gesin. Dit voel soos gister wat ek in Klasie se kantoor gesit het en vir hom sê, Klasie, ek weet nie wat gaan aan nie, maar ek kan nie my rug op daai mense draai nie. Ek het net geweet ons moes dit doen. En alle eer aan die Here wat Wapadrant ook voorberei het en ons met julle guns laat gaan het. Ons het binne 2 weke vir die kinders paspoorte gekry en dieselfde dag wat ons in die Amerikaanse ambassade ingestap het, het ons 2 ure later daar uitgekom met 5 visums. En die res is geskiedenis. En hier is ons nou in die VSA al vir 20 jaar. Ek bedien in my derde gemeente. En Lidia is skool-bibliotekaresse by 'n laerskool wat tot Graad 5 gaan.

Wapadrant, baie geluk met 'n spesiale verjaarsdag! Ek ervaar dikwels oor die jare van my bediening dat soes mense ouer word, hulle voel dat 'n verjaarsdag net nog 'n dag is. Ek het nog altyd anders gevoel daaroor en soos ek ouer word (ek was bevoorreg om my 60e verjaarsdag in Januarie te vier) word dit vir my al meer spesiaal.

Ek sien 'n verjaarsdag as 'n dag van terugkyk op die Here se liefde en genade in 'n mens se lewe. Dink net daaraan. God het in ewigheid besluit om elkeen van ons in die wêreld te bring met 'n spesifieke roeping en die allesoorheersende doel om Hom te verheerlik en vir altyd te geniet. Hoe ongelooflik is dit nie!

Maar verjaarsdae is ook 'n dag van refleksie waarop 'n mens al die middede waarmee die Here jou geseen het bedink. Middele waarmee Hy jou geseen het om die mens te word wat Hy wou hê jy moes word. Dis 'n dag van refleksie om te dink hoe jy jou roeping vervul het en of jy werklik nog instrument in die hand van die Here is.

Maar 'n verjaarsdag is ook 'n dag van vooruitkyk na die toekoms. 'n Dag waarop jy opnuut mag weet jy hoef nie te vrees nie, want die God wat my in die wêreld ingebring het, sal soos Hy reeds gedoen het tot nou toe, aanhou om my lief te hê, te beskerm, te versorg en te dra. Wat 'n wonderlike dag om opnuut weer met 'n vaste hoop die toekoms te kan ingaan, want Christus is my hoop!

Theo van Blerk

2 jaar



So, Waparant, as julle op die 28 Mei 2023 julle 40ste verjaarsdag vier, mag dit 'n pragtige tyd van refleksie wees. Dit het die Almagtige God behaag om vir Hom 'n kerk in die wêreld te bring. En as Hy die kerk in die wêreld gebring het beteken dit ook dat dit sy kerk is. En deur die jare van die kerk se bestaan het die Here sy kinders (die kerk) versorg. Hy het stoflike middele voorsien. Hy het ampsdraers voorsien. Hy het predikante voorsien. Ja, Hy het sy genademiddele voorsien (sy Woord en Sakramente) waarmee die Heilige Gees steeds die kerk opbou om die instrument te wees wat God wil hê Wapadrant moet wees. Dit is my bede dat die Here sal aanhou voorsien. Dat die genademiddele in Sy kerk altyd sentraal sal staan en dat die wat die kansel betree altyd sal sê: ek preek niks anders as Christus en Hom as die gekruisigde nie (1 Kor.1:23).

Mag Wapadrant die toekoms ingaan met Christus as julle hoeksteen! Vir die kerk van ons Here Jesus Christus is daar in elk geval geen ander hoeksteen nie. "Kom na Hom toe, die lewende steen wat deur die mense wel verwerp is, maar by God uitverkore en kosbaar is; en laat julle ook soos lewende stene opbou tot 'n geestelike huis, 'n heilige priesterdom, om geestelike offers te bring wat aan God welgevallig is deur Jesus Christus." (1 Petrus 2:4-5).

Dan sal Wapadrant ook die toekoms kan ingaan met hoop, want Christus is ons hoop. Hoop wat geanker is in die goue strate van die nuwe Jerusalem, waar Hy sit aan die regterhand van God.

Met vriendelike en verlangende groete in Christus.

Theo van Blerk
Pastor: Grace Presbyterian Church (PCA)
Ocala, FL 34470
VSA



**"Mag Wapadrant
die toekoms ingaan
met Christus as
julle hoeksteen"**

Jaco Kruger

18 jaar

Die Krugers kan terugkyk op twee dekades waarin ons lewe met dié van Wapadrant vervleg was. Dis die helfte van die gemeente se bestaan! Van ons kant af kan ons beslis getuig dat hierdie gemeenskap diep spore in ons lewens getrap het.

Ek is as proponent beroep nadat Prof. Tjaart van der Walt geëmeriteer het. Vir 'n kort rukkie het ek saam met dr. Klasie en Theo van Blerk in die gemeente gedien totdat laasgenoemde 'n beroep na 'n gemeente in die VSA aanvaar het. Kort daarna is Wilhelm beroep met die gevolg dat die ervare en wyse Klasie sy hande vol gehad het met die twee jong manne saam met hom.

Die beginjare van die 2000's was 'n tyd van geweldige uitbreiding na die sogenaamde nuwe ooste van Pretoria, en Wapadrant as gemeente het in daardie tyd ook groot geword – vir lank was dit die grootse gemeente in die GKSA wat getalle betref. Ons het op daardie stadium besef dat die manier van bediening in die gemeente moes aanpas by die relatiewe groot karakter daarvan. Soos ons vir mekaar gesê het: "mens kan nie 'n groot gemeente met 'n klein gemeente mentaliteit bedien nie." Een van die eerste groot verwikkelinge van my bediening was dus dat ons probeer oorskakel het van 'n sg. herder-kudde-model van bediening na 'n sg. "liggaam"-model. As elke min of meer tien besoekpunte 'n eie ouderling moes hê, en as elke wyk dan 'n aangewese ouderling en diaken gehad het, dan sou 'n noemenswaardige persentasie van die gemeente op die kerkrond gewees het met die gevolg dat vergaderings en besluitneming baie lomp geword het. Ons het dus hard begin werk daarvan dat ons in Wapadrant omgeskakel het vanaf 'n wykstelsel vir bediening na 'n kleingroepstelsel, waar die klem op "mekaar"-bediening geval het. Vir 'n paar jare, dink ek, het ons redelike sukses behaal, hoewel ons natuurlik nooit die ideaal kon bereik dat almal in die gemeente aktiewe deelnemers aan 'n kleingroep sou wees nie.



● Jaco, Madeleine, Marianné en Donette



● Donette en haar span deel kos uit tydens streng covid-beperkings

Jaco Kruger

18 jaar



Na omtrent tien jaar van kleingroepbediening het dit al hoe meer duidelik geword dat kleingroepe ook nie die finale antwoord is nie, en het 'n tydperk aangebreek van soek na alternatiewe vorme van bediening.

In daardie eerste dekade van die twintigste eeu was "missionale kerkwees" ook 'n groot woord op baie kerkleiers se lippe, en Wapadrant het nie vrygespring nie. My eie (en ons gesin) se soeke na maniere van geestelike lewe aan die anderkant van die konvensionele eredienste op Sondae het meer geneig na die mistieke, die kontemplatiewe en die hoog liturgiese. Vir 'n paar jare het ek retreats vir ons gemeente gereël by die Good Shepherd Retreat Centre langs die Hartbeespoortdam. Ons het ook vir 'n hele paar jaar lank so elke tweede Donderdagaand 'n Adoramus-erediens by die kerk gehad, waarin die fokus gevall het op meditatiewe sang, Lectio Divina as 'n sekere soort meditatiewe lees van 'n Skrifgedeelte, en stil gebed. Veral die stilte was belangrik. Hierdie was goeie jare.

In 2006, na 'n ontstellende nasionale sinode van die GKSA, neem Wapadrant die besluit dat ons in beginsel vroue in al drie die besondere ampte (predikant, ouderling, diaken) in die kerk sal bevestig. Kort daarna is die eerste vroue-ouerlinge bevestig, en vir 'n rukkie kon ons onder die radar vlieg, maar algaande het besware teen ons besluit vanuit die kerkverband groter geword sodat baie jare van my bediening in hierdie opsig vertroebel is dat ons baie energie moes spandeer aan kerkpolitiek. Hieroor wil ek liewer nie verder uitwei nie.

By Wapadrant het ons van baie vroeg nadat ek by die gemeente begin het, die besluit geneem dat die predikante van die gemeente nie die gemeente in drie dele sou opdeel wat elkeen dan bedien nie, maar dat ons eerder sal fokus op verskillende areas van die bediening. In die lig hiervan was die uitreikbediening van die gemeente vir baie jare die area waarby ek as predikant betrokke was. Rondom 2010 (sekerlik al van voor dit, en vir heelwat jare daarna) was ons gemeente betrokke by Mukhanyo Bybelkollege in KwaMhlanga.



● Jaco tydens die Basaar van 2018



● Madeleine en Marianné is op die bus!

Jaco Kruger

18 jaar



Ons het vir twee van die teologiese studente wat by Mukhanyo studeer het, Johannes Mbonani en Malwande Mdonga, beurse gegee. As deel van sy beursvoorwaardes het ons saam met Johannes Mbonani 'n bediening in isiZulu en seTswana onder veral huiswerkers in die kerk se omgewing begin. Hierdie bediening het bekend gestaan as Sizanani. Op 'n stadium het David Makhananise, ook 'n teologiese student by Mukhanyo, wat in een van die rondawels op ons kerkterrein gebly het, ook vir Johannes by Sizanani gehelp. Later het die uitreikbediening die kerkraad oorreed dat 'n Engelstalige erediens ook by Wapadrant begin moes word. Die beweegreden was nie dat daar 'n tekort aan Engelstalige gemeentes in die omgewing was nie, maar eerder dat dit ook op ons gemeente se pad lê om uit te leef dat mense van verskillende tale en etnisiteite in een gemeente kan saamleef.

Malwande Mdonga, wat op daardie stadium steeds besig was met sy studies by Mukhanyo, is deur middel van 'n bedieningskontrak betrek om die voortou by die Engelstalige bediening te neem. In daardie jare – min of meer so tussen 2012 en 2014 – het van ons gewonder of en hoe Wapadrant ook 'n multikulturele gemeente sou kon word. In 2013 het ek selfs 'n studietoer na die VSA onderneem om 'n paar multikulturele gemeentes te besoek en te kyk hoe hulle dit doen.

Teen omtrent 2014 is die saak op die spits gedryf en het die kerkraad besluit dat Wapadrant nie een van die twee swart proponente wat toe by die Sizanani en Engelstalige bedienings betrokke was gaan beroep nie, en dat die korttermyn bedieningsooreenkoms met hulle ook nie hernu kon word nie. 'n Paar jaar daarna is Johannes Mbonani deur die hulp van GK Wierdapark, na Olievenhoutbosch beroep, van waar hy tot vandag toe die Sizanani-bediening in Wapadrant se kerkgebou op Sondae hanteer.

Malwande Mdonga is deur New Life City Church beroep as sendeling en met die ondersteuning van individue uit Wapadrant het hy Rainbow Christian Fellowship begin, wat tot vandag toe in die ou jeugtent op die kerkterrein op Sondae eredienste hou. David Makhananise is vir lank deur Wapadrant se diakonie gehelp en hy het op sy beurt 'n bediening op Cyferskuyl tussen Hammanskraal en Bela-Bela begin. Tot vandag toe is daardie bediening egter nie selfstandig nie.

Behalwe hierdie verwikkelinge was die ander groot ontwikkeling van die uitreikbediening by Wapadrant die tot stand bring van drie nie-winsgewende organisasies om, langs die uitreikbediening van die gemeente, uitvoering aan die gemeente se uitreikvisie te gee. Burundi-mission het vir Timothy van Aarde en Ruben Safari ondersteun met hulle opleiding van predikante in Burundi. Kruiskulturele bediening (Kruik – nou Missio Dei) is in die lewe geroep om vir Petrus Grové, wat as sendeling van Wapadrant beroep is, te ondersteun. En Sunrise Road NPO is begin om gemeenskapsprojekte in ons gemeente se nabye omgewing aan te pak. Van hierdie projekte is die Sunrise Traumasentrum by Garsfontein Polisiestasie en die Sunrise naskool by ons kerkterrein sekerlik van dié waaroor ek die dankbaarste is. Later het die Rise-Up liefdadigheidswinkel ook bygekom wat nuwe energie losgemaak het.

Jaco Kruger

18 jaar



Vanaf einde 2015 het ek die roeping ervaar om weer meer in die akademie betrokke te wees en in daardie tyd het ek 'n betrekking as senior lektor in Filosofie by St Augustine College of SA aanvaar. Ek wou egter ook steeds op 'n deeltydse basis by Wapadrant as predikant betrokke bly, en die feit dat 'n gereformeerde gemeente dit toegelaat het dat een van hulle predikante by 'n Katolieke tersiêre instelling klasgee sowel as dat St Augustine College dit toegelaat het dat 'n Dopperdominee een van hulle lektore kan wees, bly vir my een van die groot wonderwerke van die afgelope jare.

Dit, in breë trekke, van die hoogtepunte van my bediening wat vir my uitstaan. Bediening is egter 'n onpersoonlike woord. Uiteindelik gaan bediening om die mense. En dis moeilik om oor die mense te skryf, want 'n mens wil nie een van hulle weglaat nie. Genoeg om te sê dat dit eintlik die mense is wat mens bybly nadat jy nie meer by die gemeente is nie. Sondae by die kerk, miljuisende nimmereindigende vergaderings in die aande, gemeente-byeenkomste, kerkkampe, "Lig kom terug", huisbesoeke en hospitaalbesoeke... So baie liefde beleef, soms seergekry en kwaad geword, maar soveel verryk deur so baie wonderlike mense.

En dan het ek tot nou toe nog slegs in die eerste persoon gepraat! Maar slegs 'n paar weke nadat ek by Wapadrant bevestig is in 2002 het ek aan Donette verloof geraak, en vroeg in 2003 is ons getroud. Donette is 'n spanspeler en 'n leier in eie reg. Sy het haar eie stempel in die gemeente afgedruk in die onverskrokke manier waarop sy as jonggetroude dominee se vrou leiding moes gee terwyl sy as argitek haar eie besigheid bly bestuur het. In 2006 is Madeleine gebore en in 2010 Marianné en hulle teenwoordigheid het ons gesin oneindig verryk, maar natuurlik ook besiger gemaak.

Vandag gaan dit met ons gesin baie goed. Ek is nou mede-professor by St Augustine College of SA wat, nadat hulle amper finansieel ondergegaan het tydens COVID, darem nou weer bietjie meer stabiel is. Daarbenewens werk ek saam met Donette in haar argiteksfirma, We Do House Plans (onthou dit as iemand miskien hulle huisplanne moet laat opdateer of by die stadsraad laat goedkeur 😊). Madeleine is hierdie jaar in Graad 11 in St Mary's DSG en Marianné, wat tans in Gr 7 in St Paulus is, sluit volgende jaar by haar aan.

Liefdegroete,
Jaco, Donette, Madeleine, Marianné

"Ons wens Wapadrant net die beste toe vir die volgende tye van die gemeente se lewe."

Wilhelm Leuschner

15 jaar

Lieve Wapadrant

Ons vier 40 jaar saam met julle! Ons het die voorreg gehad om amper 16 van die 40 jaar deel van Wapadrant te wees – van 2003 tot 2018. Al 3 ons kinders is in Wapadrant gedoop. Vandaag is 1 op universiteit, 1 in die hoërskool en 1 in die laerskool.

Ons dink met groot vreugde en verwondering terug aan ons tyd daar. Daar was verskeie hoogtepunte, waarvan die grootste sekerlik die mense was wat ons leer ken het en werklik vriende geword het.

40 is 'n belangrike getal in die Bybel. Telkens wys dit op 'n oorgang, 'n verander na 'n nuwe wêreld, 'n nuwe fase: 40 dae en nagte se reën, 40 jaar se reis in die woestyn, Jesus is vir 40 dae versoek, Jesus is vir 40 dae na sy opstanding tussen sy dissipels voor sy hemelvaart.
40 is 'n tyd van terugkyk en vier, maar veral van vorentoe kyk en vaar.

Ons gebed vir Wapadrant is 'n wonderlike reis vorentoe saam met God op sy Pad.

Liefde

Wilhelm, Machel, Friedrich, Juan en Elrie.



**"Ons gebed vir
Wapadrant is 'n
wonderlike reis
vorentoe saam met
God op sy Pad."**

Peet Vermeulen

18 jaar (steeds in diens)

Sedert ons in 2005 in Wapadrant-gemeente gekom het, het die gemeente sowel as ons gesinsomstandighede verander. Daar was op 'n stadium 5 eredienste elke Sondag met die Straatkafee 'n persoonlike hoogtepunt. Ons kinders was onderskeidelik in die laer- en hoërskool en is tans onafhanklik, volwasse in eie reg. Die kinders is getroud en die Here het twee kleinkinders by ons uitgebreide familie gevoeg.

Die werk in Wapadrant was van dag een af 'n uitdaging en 'n voorreg. Daar was baie geleenthede en kreatiwiteit in 'n dinamiese span.

Saam met medegelowiges kon ons byna jaarliks in dele van Afrika toer, God se handewerk bewonder en die Woord uitdeel. Vele wonderwerke is beleef. 'n Jong man (vanaf die straat) in die platteland van Zambië het, nadat hy 'n Bybel ontvang het, gereeld op 'n berg gaan sit en die Woord gelees. Hy is so deur die Gees gegryp dat hy van studierigting verander het en hy is vandag 'n predikant. Dit was 'n voorreg om sy gradeplegtigheid in Lusaka by te woon.

Die Here het verskeie engele uit die gemeente op ons gesin se pad gebring wat ons lewensreis verryk en baie waarde toegevoeg het.

'n Mooi moment wat my altyd sal bybly was een oggend tydens 'n erediens. Dit was taai om te reën en die stowwerige aarde het gesmag na water.

Tydens die preek het dit begin reën en ek het onmiddellik gesien die gemeente luister nie meer na die preek nie. Sommige het na die dak opgekyk, almal het gefokus op die reën wat uitgesak het. Ek het ophou preek en die gemeente het spontaan begin handeklap uit dankbaarheid vir die reën.

Peet Vermeulen



"Wat 'n voorreg om saam met die gemeente 40 jaar te vier. Dit is 'n voorreg om in Wapadrant te dien."

Petrus Grové

13 jaar (steeds sendeling)

Die Here is so lief vir ons dat hy mense en geleenthede in ons rigting stuur, om te help lewe blaas in ons rokerige flou vuurtjie, om hout te pak sodat die vlammetjie vastrapplek kan kry om sy helder lyf bo die hout uit te steek. Die vlammetjies wat in ons lewens brand is altyd die resultaat van die "Olie" wat God in ons bedien en talle mense wat deur Hom aangevuur word om te help hout aandra, sodat daar tog warmte en lig uit ons menslike gebrokenheid kan kom.



Wapadrant was so 'n Godgegewe lewe-blaser in ons gesin se bestaan. Veertien jaar terug was ons in 'n woelige onseker tyd, die Here het ons aangepor om besig te raak met 'n ander soort Koninkryksbediening wat beteken het dat ons die sekuriteit van ons destydse bediening moes verlaat. Ons het geweet ons moet gaan, maar hoe ons dit sou maak was nog versteek agter die gordyn. Hierdie onsekerheid maak dat mens huiwerige treë vorentoe gee in die soeke na vaste grond.

Wapadrant was die eerste wat God gebruik het om hand uit te steek na ons sodat ons die eerste onseker klofie oor kon spring. Ons is in 2009 na die gemeente beroep en dit het veroorsaak dat ek kon voortgaan om as predikant te dien wat baie beteken het vir die integriteit van ons bediening. Behalwe dat Wapadrant dadelik bereid was om te begin help met finansiële ondersteuning, was daar ook lidmate in die gemeente wat gehelp skep het aan 'n nie winsgewende organisasie sodat ons bedieningstruktuur en verdere ondersteuning elders kon bekom.

Die Here het dus Wapadrant as instansie op ons pad geplaas om Missio Dei Suid-Afrika as instansie te help oprig. Hy het lidmate met ons paaie laat kruis sodat klein vlammetjies groter geblaas kon word. Ek sal nooit vergeet hoedat 'n lidmaat vanuit die gemeente, wat ek op daardie stadium nog nie eens ontmoet het nie, vir ons 'n voertuig geskenk het waarmee ons ons bedieningswerk kon begin doen. Daar was ondersteuning op verskillende maniere, die mense van Wapadrant het vinnig ons vriende, ons familie geword, 'n skare gelowiges wat ons aanhits. Hierdie beginaksies van die gemeente was vir ons 'n wonderwerk uit God se hand en ons kon al sterker en groter treë gee.



● Marietjie, Antonie, Sloet en Mieke Grové



● Erfenisdag 2022 in Ficksburg

Petrus Grové

13 jaar (steeds sendeling)



Soos die tyd verloop het die band met Wapadrant al hegter gegroei. Vanuit die gemeente het gemotiveerde lidmate ons gereeld besoek en kom help bou aan die verskillende projekte, monumente wat getuig van God se goedheid.

Vandag speel Wapadrant steeds 'n groot rol in die funksionering van projekte wat al tot in die Kaap strek. Daar vloei steeds baie skenkings vanuit die gemeente na projekte; ons kar kreun altyd onder die gewig van goedheid as ons na Sondag se preek koers kies terug Vrystaat toe. Daar is omrent nie 'n kop in ons omgewing wat nie weet hoe voel 'n warm Wapadrant-wolmussie nie! Nie net het Wapadrant eerste 'n hand na ons uitgesteek nie, maar stap die gemeente steeds saam om deur God se genade te help hout aandra sodat die vlamme tot eer van Christus hoog kan brand.

Die gemeente het my en my gesin ook toegelaat om hand uit te steek na Wapadrant. Deur die genade van die Here kan ons darem ook so nou en dan 'n houtstompie aandra na die gemeentevuur. Sedert 2009 het ek die voorreg om 'n paar keer per 'n jaar in die gemeente te preek. Hierdie voorreg het my oor die jare geïnspireer om betrokke te bly by gemeentebediening en my opgewonde gehou oor die impak wat gemeentes kan maak. Die stadbouersbeweging het juis ontwikkel omdat Wapadrant so 'n goeie plek is om by vuur te maak. Daar is 'n besonderse rede hoekom God Wapadrant 40 jaar terug in die lewe geroep het, spesiaal vir 'n tyd soos hierdie.

Dis 'n voorreg om saam met Peet, Rassie en al die lidmate deel te wees van die Stadbouersbeweging. Ek is werklik opgewonde oor die impak wat elke lidmaat reeds en nog kan maak tot verandering van die wêreld waarin ons leef.

Die afgelope 14 jaar was voorwaar 'n groot avontuur saam met Wapadrant; ek dank die Here vir die gemeente, ek dank die Here vir elke lidmaat. Dis 'n voorreg om saam met julle te dien. Mag die Koninkryksvure nog hoër brand.




"Mag die Here deur ons gemeente verder bou aan die "stad" en mag dit hoop bring soos stukkende mure herbou word waar elkeen reeds werksaam is."

Rassie Smit

10 jaar (steeds in diens)

Dis net so oor die tien jaar gelede wat ek en Alna saam met ons kinders by Wapadrant aangesluit het. Tien jaar kan 'n lang tyd wees, maar party dae voel dit asof dit gister was wat ons hier aangekom het.

In hierdie tien jaar het ons beleef hoe die Here ons gemeente ryklik seën. In hierdie tyd het ons elkeen ook werklik gegroei in ons geloof en ons menswees.



Hier is iets van ons indrukke van ons belewenis by Wapadrant oor die afgelope tien jaar:

T – die naam Wapadrant eindig met t (nie met 'n d soos die woonbuurt nie). As jy op taal en spelling ingestel is, vang dit dadelik jou oog. Dit laat jou dink en vra. Uiteindelik verstaan jy dat dit ons gemeente onderskei van die woonbuurt, maar dat beide tog maar dieselfde oorsprong het. T staan vir trekpad. Die transportroete wat in die beginjare van Pretoria hier deurgegaan het na die ooste toe. Wapadrant is saam met baie ander reisigers op pad. Van die begin af was die keuse bewustelik: ons gaan geen oomblik verder as dit nie saam met die Here is nie. Daarom ook ons leuse en uitnodiging op die muur by die ingangshek: Almal saam op God se pad.

I – Wapadrant is 'n interessante gemeente, met 'n wye verskeidenheid van interessante lidmate wat interessante dinge in die lewe doen. Soos wat 'n mens as predikant al meer lidmate leer ken, staan jy toenemend verstom oor waar die Here ons lidmate oral gebruik in die stad en in die wêrld.

I kan ook staan vir ingewikkeld. Veral in die begin was dit nogal moeilik om te verstaan waarvoor al die afkortings staan. En net as jy dit mooi begin bemeester, kom daar nuwes by of die oues verander: RVO (Raad van Ouderlinge), HO (Herder Ouderlinge), BDG (Bestuursdiensgroep), FWG (Finansiële Werkgroep), SWG (Strategiese Werkgroep), EDG (Erediens Diensgroep), KG (Kleingroep) en wat nie alles nie! Maar soos wat 'n mens al meer vertroud raak met die manier van doen in Wapadrant, is dit al meer insiggewend en besef jy dat hier werklik 'n goeie rede agter elke besluit en strategie is.



● Rassie se intreepreek in 2013



● Rassie en Alna Smit

Rassie Smit

10 jaar (steeds in diens)



E – staan vir ewewigtigheid. Ewewigtigheid in besluitneming, maar ook in die hantering van ons wye verskeidenheid lidmate. Hier word nie sommer net besluite geneem nie. Die grondwerk is deeglik. Debattering van sake is intringend. En daar is altyd goeie gronde as motivering. Een van die besluite wat al lank geld, is dat Wapadrant verskeidenheid omarm en graag vir elke lidmaat 'n geestelike tuiste wil wees. Die twee oggendienste met verskillende idiome (Kontemporêr en Klassiek) is 'n goeie voorbeeld hiervan.

N – staan vir nuut. Nuwe denke. 'n Nuwe pad. Die nuwe lewe wat ons Here Jesus deur sy Woord en Gees in ons werk. Wapadrant staan bekend as 'n gemeente wat nie altyd konvensioneel optree nie. Ons vra na beginsels en probeer bepaal hoe die Here wil hê ons dit binne ons konteks van vandag moet toepas. Ons vernuwe nie ter wille van vernuwing nie, maar om so goed as moontlik die opdrag van die Here te probeer gehoorsaam. Ons het natuurlik genoeg swak plekke en blinde kolle, want ons is nog nie in die hiernamaals nie. Maar hier is 'n baie spesiale warmte en liefde onder mekaar – en 'n diep dankbaarheid oor die seëninge waarmee die Here ons oorlaai. Ons verstaan al hoe meer dat ons taak in die wêreld as kerk van die Here huis is om die geloof, hoop en liefde wat Hy in ons harte werk, effektief te leef en te vertel in 'n wêreld wat smag na hierdie heerlike waarheid, maar terselfdertyd toenemend verander en ontwikkel. Daarom is Wapadrant 'n opgewonde, dankbare en vasberade gemeente.

Dit is 'n voorreg om in diens van die Here in Wapadrant te kan wees. Mag Hy ons gemeente nog lank spaar en seën. Mag Hy ons meer en meer diensbaar maak in sy koninkryk. Mag ons elke dag nog beter gestalte gee aan die visie wat Hy in ons werk om saam met Hom die stad te restoureer en op te bou tot sy lof en eer!

Rassie en Alna Smit



● Rassie en Alna Smit (2023)

"Mag Hy ons meer en meer diensbaar maak in sy koninkryk."

EERSTE DOPELING

'n Leeftyd van herinneringe en ervarings

Sjoe, om die eerste baba te wees wat destyds gedoop is in die nuut gestigde GKW (Gereformeerde Kerk Wapadrand) voel amper soos 'n ereposisie (alhoewel my ouers seker eintlik die ereposisie toekom). Hierdie was ook 'n onnodige herinnering dat ek hierdie jaar 40 word... ek is met ander woorde so oud soos die kerk se fondasies.

Elkeen van my kinder- en tienerherinneringe is op een of ander manier gebind aan GKW, of dit die lewenslange vriendskappe, kerkkampe, jeugaksies, gemeentesamtrekke of jeugkomitee was... En so baie van my fondasielesse, ervaringe en beginsels is geleer op die ou GKW grondpaaie,

By die kerk het ek mentors gehad wat vir my die basis gegee het om te ontwikkel as mens, as leier en as verantwoordelike, deernisvolle volwassene.

Daar was so baie goeie tye, en ek sal baie lank kan aangaan, en dalk selfs 'n paar gemeentelede grys hare gee, as ek van die stories moet vertel. Ons het gereeld 'n jeugkamp gereël terwyl die pastorie nog oop was, want 'n hele naweek saam met jou pelle is mos altyd 'n goeie idee, veral met 'n trollieresies van die kerkkantoor af tot.. wel, tot die trollie bots teen 'n boom, groep kosmaaksessies, slaapsak op die kerkbanke, boeresport, fliekmarathonne, kampvuurstokbrood en soveel meer. Ek onthou die een keer wat ek saam met die ander jeugleiers voor al die ernstige ooms (ouderlinge) in 'n kerkvergadering met 'n dun bewerige stemmetjie gaan praat het om oom Gawie by ons as jeugleier te hou.

Ek het my eerste kêrel by die kerk ontmoet en geleer langarm (ja, dans!) op jeugkampe.

Ek het die geleentheid gekry om by verskeie gemeenskapsinisiatiewe in te skakel soos Koningskinders en uitreike na buurkerke. Ek het vriendskappe gemaak en verloor; seer gekry en weer gesond geword. Maar laat ons aanbeweeg...



ek was die geleentheid gegee om my stem, my styl en my geloof te ontdek, te ontwikkel en vas te sement gedurende daardie jare.

En nou dat ek stil sit en weer terugdink, besef ek eintlik vir die eerste keer hoe belangrik daardie tyd was en watter invloed dit gehad het op die mens wat ek nou is – my verhouding met die Here is 'n konstante, onderliggende goue draad wat reg deur elke fase van my lewe span, en dit het by GKW begin.

Ek het 'n leeftyd van GKW-herinnerings en ervarings wat ek koester, soveel dat ek nie eers almal meer onthou nie. Daar is soveel mense wat gedurende my tyd by GKW 'n onmeetbare impak op my en my toekoms gehad het, ek is nog altyd dankbaar elkeen van julle is so kosbaar vir my.

Ek wil afsluit eerstens met die "enlightenment" wat my vandag weer aanspreek – 'n kerk/geloofsfiliale of gemeenskap, veral vir die jeug en jongmense is absoluut essensieel. Die waarde wat dit vir 'n ontwikkelende jongmens bring kan op geen ander plek gekry word nie. Kinders, jong mense – sluit aan by jou jeuggroep, bou jou vriendekring daar. Ouers stuur julle kinders na die jeugaksies.

Dan hiep-hiep-hoera, wat 'n wonderlike mylpaal en viering – ons is baie dankbaar vir 40 JAAR van gemeenskap, kerk, familie, geloof en bo alles, 40 jaar van daagliks toewyding aan God en sy koninkryk. Mag die Here se seën en voorspoed nog vir 'n verdere 40x40 jaar op GKW wees.

Marisa Lensink
(Dogter van Hans en Isabel Lensink)

PERSONEEL HERINNERINGE



● Renie, Helena, Jan, Riaan, Ilda en Gawie (2008)



● Riaan, Jan, Helena, Renie. Voor: Gawie en Ilda (2008)



● Seni en Jacob (2020)



● Personeel jaarafsluiting (2020)



● Zanelda, Esmé, Ilda en Errol (2021)

"Agter die skerms word geswoeg en gesweet, gewerk en gelag. Maar ons diens is tot uitbou van die Koninkryk van God en tot Sy eer".

Ek onthou



Op 1 Augustus 1984 aanvaar ek 'n aanstelling by Geref Kerk Wapadrant (WPR) en is nou na bykans 39 jaar nog werksaam in die kerkkantoor.

Tot nou toe het ek 10 predikante beleef en oorleef – elkeen met hul eie unieke persoonlikheid!

Ek onthou:

- 'n Jaar nadat WPR van Alkantrant-gemeente afgestig het was die kerkkantoor in my huis in Garsfontein gehuisves – slegs 'n lessenaar, staalkabinet en 'n tikmasjien. Die lidmaatrekords was 'n kaartstelsel (sulke groen kaarte) - een laai met die name in alfabetiese orde en die ander laai met die wyke.
- Ek kan goed onthou hoe ds. Kotie de Jager (1ste predikant) met sy swart BMW-motorfiets my kom besoek het en dan het ons die omgewingskaart op die vloer gesit en so het ons twee op die knieë die besoekpunte gemerk met gekleurde speldjies.
- Dr. Klasie Heystek was die tweede predikant en hy het hier aangekom met so bruin Volvo 144 sedan. Ons glimlag tot vandag nog daarvoor! Sy kinders was baie skaam oor daardie motor en hy moes hulle inwag om die eerste hoek van die skool af!
- Die eerste weeklike nuusbrieftjie is op die tikmasjien die lig laat sien. Donderdagaande het ek die getikte bladsye na Johan en Dalena Erasmus se huis geneem en daar het ons dit gedruk. Die oplaag was maar baie min.
- Latere nuusbrieftjies is gedruk by Plant Print, Glenwoodweg. Philip Willemse (nou weer lidmaat) was daar werksaam.
- Alle vergadering-dokumentasie is bymekaar gemaak gedurende die week en is dan saam met die nuusbrieftjie geneem vir afdrukke.
- Jan Meyburgh (nog steeds lidmaat) het die boekhouding hanteer. Tjeks is uitgemaak vir alle uitbetaalings. Na hom was daar nog 'n paar kassiere en die tegnologie het toe ingeskop.
- Terwyl die kerkgebou opgerig is, is die huidige kerkkantoor (wat voorheen 'n woonstel was) as terreinkantoor gebruik deur Oom Gert Nienaber, ons bouvoorman.
- Die woonstel is na voltooiing van die kerkgebou reggeruk. Ek betrek daarna die kerkkantoor met 'n rekenaar en 'n fotostaatmasjien.
- Die kerkgebou was tussen hoewes geleë. Waar Welgevonden-woonstelle nou is, was 'n boskroeg. Een aand met 'n huweliksonthaal het hulle die drank uit die saal gesteel (daar was nog nie alarms nie), maar dis darem opgespoor by die draadheining.
- Die eerste ingang tot die kerkgebou was destyds by Atterburyweg aan die suidekant van die kerkterrein. Die ingangstruktuur staan nog daar!
- Van die predikante het in die pastorie gewoon (nou die Jeugkantoor) en is ek baie bederf uit die pastoriekombuis.
- Ek was vir jare die enigste personeellid naas die predikante. Soos wat die gemeente gegroeи het, is verskeie aanstellings gemaak en is die personeelkorps uitgebrei tot die huidige 15.

Wat 'n voorreg om vir soveel jare in diens van die kerk te wees. Ek het beslis van haarkleur verander. Wonder of die kerkkantoor dit veroorsaak het, want daar is nooit 'n vervelige oomblik nie! Lidmate het gekom en gegaan. WPR bestaan nou 2 192 lidmate, waarvan ongeveer 94 vanaf afstigting lidmate is. Saam het ons 'n geseënde pad geloop en hulle is almal staatmakers. Dankie Wapadranters dat julle my vir soveel jare verduur.... aftree begin loer vir my!

Helena Aucamp

My terugblik

Vyf-en-twintig jaar is vir party seker 'n leeftyd en daar kan nogal baie gebeur. Dit is hoe lank ek nou al voltyds by die gemeente betrokke is. In 1998 is ek hier aangestel as 'n jeugwerker. My kinders, die twee seuns, was nog klein en voorskool. Nou is hulle albei al getroud en het hulself goed gevestig in die arbeidsmag van SA en België onderskeidelik.



Ons laatlam-dogter is gebore in hierdie tyd en is ook alreeds uit die skool. Hoekom noem ek dit as deel van my ervaring by die gemeente? Omdat dit vir my 'n weerspieëeling is van wat alles in 25 jaar kan gebeur. Ek gaan dus hiermee probeer om net 'n paar hoofpunte te noem.

In 1998 was die gemeente nog 'n jong gemeente, maar reeds goed gevestig in die ooste van Pretoria. Toe reeds het die lidmaatgetalle gegroeи tot 1009 belydende lidmate en 377 dooplidmate. (Die jeug was dus in verhouding 38% van die gemeente). Daar was baie gesinne met kinders, asook heelwat studente en jong werkende lidmate.

Wat daardie jare uitgestaan het as die etos enbeeld van die gemeente was dat dit 'n verandering-fikse gemeente was wat baie nuut en vernuwend gedink en gedoen het. Aan ywer om te werk in die gemeente was daar geen tekort nie en met ons aankoms het ons onder andere 'n baie ywerige groep betrokke ouers by die Jeugbediening gevind wat regtig wou sien dat die gemeente se bedieninge 'n verskil gaan maak aan hulle kinders se geestelike groei.

Dit was toe baie lekker om Jeugbediening te doen, want almal wou help en was betrokke daarby. Die beste om dit ook volgens aardse terme te vergelyk, was dat die finansiering van die Jeugbediening vir meeste van die ouers, maar ook die Kerkraad, baie belangrik was. Alle fondse van daardie jare is apart ingesamel vanuit die ouers se geledere en geskenk vir die doel, sodat ons op 'n tyd met 'n begroting van amper R1m per jaar kon werk.

Dit het ons in staat gestel om in die 12 jaar wat ek toe by die Jeugbediening betrokke was, so die bediening te kon uitbrei en veranderings aan te bring wat o.a. ingesluit het om weg te beweeg van 'n katkisasiebenadering na 'n kleingroepbenadering, wat dus nie net die toerustingselement nie, maar ook lofprysing en aanbidding, onderlinge omgee vir mekaar en diensbaarheid ingesluit het. Die bediening is ook onderverdeel om 4 aparte bedieninge te vorm, nl. Voorskool, Laerskool, Hoërskool en Naskool.

Elkeen kon toe op hulle spesifieke portuurgroep se unieke behoeftes fokus. Later is 'n 5de been bygevoeg, nl. Gesins- of Ouerbediening. In hierdie tyd is daar ook aparte jeugeredienste vir die jonger jeug (laerskool) en die ouer jeug (hoërskool en naskool) geskep. Hierdie soort verdeling het genoodsaak dat ons gefokusde personeellede daarvoor kry en vir dié doel moes ons die personeelkant van die Jeugbediening ook uitbrei, en daar is nog aanstellings gemaak.

Gawie se terugblik...

Ons het poste geskep vir 'n Voorskool- en Laerskool-jeugwerker, sowel as 'n administratiewe pos. Later het ons ook 'n pos geskep vir die hoër- en naskooljeug. Ilda vd Merwe was een van die eerste aanstellings, waar sy vanaf 2007 die Admin- en die Voorskool-jeugwerkersonspos gesamentlik gevul het. Hierna is Carien Erasmus (later Human) in 2009 aangestel as die Laerskool-jeugwerker met die hooffokus 'n gesamentlike jeugerediens vir die betrokke groep en kleingroepbediening.

In 2009 skei ons Ilda se pos en sy fokus hierna net op die voorskoolbediening en ons stel vir Mariaan Van der Walt aan om die administrasie te doen van die Jeugbediening. Gedurende hierdie tyd begin ons ook kyk na jeugwers vir die hoëskooljeug en naskoolse jeug onderskeidelik, maar combineer dit eers in een pos. Chris de Beer staan hier in vir 'n kort tydperk voordat hy begin teologie studeer het. Daarna stel ons 'n proponent, Pierre Engelbrecht, vanuit die NG Kerk-geledere, aan in hierdie pos vir 2 jaar. In dieselfde tyd kom daar ook 'n paar bedankings by die voorskool- en laerskoolbedieninge en word Collette Nienaber en Elene Maree onderskeidelik in hierdie poste aangestel.

Wat myself aanbetrif, maak die kerkraad toe reeds groot veranderings in 2010 met 'n herstrukturering van die personeel en hulle bied vir my die pos aan as registrator, waarin ek tot vandag toe, na 13 jaar, dien. Volgens my eie waarneming het hierdie herstrukturering ongelukkig 'n groot leemte gelos in die Jeugbediening wat toe nie weer gevul is nie en die Jeugbediening het ook nie weer die poste gevul nadat Pierre, Collette en Elene weg is nie. In 2012 word wel 'n Predikante-assistent/Ondersteuningspos geskep, met die fokus op Jeugbediening en Herman Klopper word aangestel. Hy bedank in 2013 en die kerkraad besluit om weer 'n jeugwerker aan te stel wat tot vandag toe gevul word deur Errol Mears, sowel as 'n 4de predikant te beroep met gesinsbediening as hooffokus.

As registrator was daar heeltemal nuwe uitdagings vir my, in so 'n mate dat die laaste 13 jaar verskriklik vinnig verby is in my lewe. Skielik was ek besig met die bestuur van die gemeente se sake. (Dit het my goed besig gehou.) Daar moes onder ander 'n nuwe en verbeterde finansiële beleid opgestel word, asook 'n personeelbeleid wat insluit 'n vergoedingstruktuur en beleid. (Dit is intussen afgehandel en is reeds in werking.)

In die algemeen gesien, tydens hierdie 25 jaar ervaring, was WPR se leierskap konstant op soek na beter en werkbare metodes om die visie en missie van die gemeente te verbeter. In my laaste 13 jaar het daar heelwat strategiese beplanning met implementeerbare planne na vore gekom. Dit het ook die strukture 'n paar keer laat verander. Dit kan soos volg opgesom word: Die Kerkraad is op 'n tyd verander na die Raad van Ouderlinge (RvO) en wat ondersteun is deur diensgroepe (Administratiewe diensgroep; Erediensdiensgroep; Finansiesdiensgroep; Jeug- en Gesinsdiensgroep; Kleingroepdiensgroep; Pastorale Dienssentrum; Personeeldiensgroep; Terrein- en Geboue-diensgroep; Uitreikdiensgroep wat die Diakonie ingesluit het) en word toe saamgevoeg as die Bestuursdiensgroep (BDG), met elk van die genoemde bedieninge se voorsitters wat op die BDG dien.

In 2011 skep die RvO ook 'n Dagbestuur wat na die dag-tot-dag-sake van die RvO kon omsien en vandag nog so funksioneer.

Gawie se terugblik...

In 2012 word 'n tweede groep ouderlinge geskep, wat bekend gestaan het as die Herder-ouderlinge (HO). Hiermee is die pligte van die ouderlinge in 2 dele/groepe verdeel: Die RvO sou omsien na die daarstelling, instandhouding en uitlewing van die gemeente se visie/missie en was dus verantwoordelik vir die oorkoepelende rigtinggewende strategie, asook as die regsliggaam wat omgesien het na die bestuur van die gemeente. Die HO is aangestel met die spesifieke opdrag om die gemeentelede te bedien, veral die lidmate wat nie deel is van aktiewe kleingroepe (KGe) nie.

Verder was die HO se opdrag om lidmate aan te moedig om deel te wees van kleingroepe asook om die gemeentelede aan te moedig om die vyf fokusareas (Christelike lewenswyses) uit te leef. In 2018, na heroorweging, word hierdie model afgeskaf en word al die ouderlinge weer saam gevoeg as die Kerkraad. Gesamentlike vergaderings saam met die Diakonie word ook ingevoer en staan later bekend as die Breë Kerkraad.

In 2018 word die BDG ook ontbind en vervang met 21 bedieninge: Inskakeling; Jeugbediening; Gesinne; Volwassenes; Seniors; Kleingroepe/Omgeegroepe; Enkelouers; Barmhartigheid; Herderlike Versorging; Siekesorg; Geloofstoerusting; Lewenstoerusting; Dissipelskaptoerusting; Genadegawe-toerusting; Uitreikaksies; Eredienste; Gebedsgroep; Lofprysing; Digitale Bediening; Pastorale Dienssentrum, met ondersteuning van die Strategiese werkgroep, Finansieswerkgroep, Kerkkantoor en Terrein- en Geboue-komitee, wat almal aan die KR rapporteer. Die plan was dat ouderlinge en diakens onderling hulle self so verdeel dat hulle by ten minste een bediening betrokke sal wees. Vanaf 2021 word die huidige "Stadsbouersvisie" geïmplementeer met die 4 hoofsake wat daaruit prioriteit kry: Geestelike terrein, Sosiale terrein, Omgewingsterrein en Finansiële terrein, met ouderlinge en diakens wat weer daarby ingedeel is.

My persoonlike afleiding uit bogenoemde opsomming, is dat WPR se leierskap vir die laaste 25 jaar (en ek is baie seker in die tyd daarvoor ook) altyd bereid was om te soek na 'n verbeterde bedieningsmodel, tot voordeel van die lidmate. Veranderinge is makliker geïmplementeer as by ander Gereformeerde gemeentes in Pretoria, wat ook weer kon bygedra het tot die groei van die gemeente. Ek is dankbaar vir die geleentheid wat ek kon hê en steeds het om ook so my talente en gawes tot voordeel van die gemeente aan te wend en tot uitbreiding van God se koninkryk op aarde.

Gawie Jooste

My herinneringe

Toe die kerkterrein nog in aanbou was het ek dit gereeld besoek. Alles was nog plaas rondom. Ek het die gevoel gekry dat ek hier wil betrokke raak. Met vier klein kindertjies, waarvan my oudste seun se gesondheid baie van my tyd in beslag geneem het, het ek gedink dat ek dit sal kan behartig.



Na 32 jaar is ek nog steeds hier. Daar is 'n heerlike atmosfeer op die kerkterrein en vir grond en bome het ek 'n groot liefde.

My oudste dogter het my altyd Sondae flink gehelp, natuurlik teen 'n vergoedingtjie. Iemand het haar klein Samuel genoem.

Dis heerlik om so baie mense te leer ken.

Baie dankie vir al die kleingroepe wat Sondae help in die kombuis, vir Annetjie Willemse wat altyd bereid is om as "aflos-koster" in te staan as ek verlof neem – dankie vir al jou liefde!

Dankie vir Seni wat al die naweekfunksies as koster oorgeneem het. Altyd lekker om saam met hom te werk (Seni bly op die terrein en hy help altyd met alles!).

Dankie vir almal se samewerking – onthou ons is "Elkeen saam op God se pad".

Irene Hugo



My story

Monday, 2 February 2004, was the day I started working for the church and I also resided on the church's premises. I was 19 years old and single. By the grace of God, 2 February 2023 is my 19 years anniversary at Wapadrant. Even though I was not a permanent appointment at that time, I had a nice working experience and was given respect by most, which was really amazing despite being the youngest employee.



Long story short, I was working as a casual worker while pursuing my career goals with Unisa. In 2005 I was then eligible for a full-time permanent position. In 2008 I met the love of my life, Karlina (my bokkie). We are happily married and are also blessed with two children, Ofense (14) and Rebabedi (8).

I was promoted to caretaker along the journey and recently was also promoted to office assistant and Pakhuis manager. As I think about my experience I cannot keep myself from reflecting on what these 19 years have been about.

Now as I continue this journey of learning and exploring under a greater leadership of my superiors. I would like to quote this verse to you: 1 Cor 15:10 "By the grace of God I am what I am, and His grace to me was not without effect. No, I worked harder than them, yet not I, but the grace of God that was with me".

May the love and grace of God be with you!

Seni Nkumishe



● Karlina, Seni, Ofentse, Voor: Reba (2023)



UITREIK BEDIENING

By Wapadrant-gemeente is Uitreik 'n passie en die gemeente ondersteun (finansieel en andersins) verskeie projekte waardeur daar 'n impak op mense se lewens gemaak word.

Die amptelike uitreikprojekte is die projekte waarvoor die Uitreikkantoor jaarliks begroot en 'n gedeelte van Wapadrantgemeente se bydraes word vir die projekte aangewend. Die res van die begroting word deur die projekte self ingesamel.

Die drie amptelike uitreikprojekte van die gemeente is SunRise (wat uit vier bene bestaan), Missio Dei Suid-Afrika en Missio Dei Education, wat uit Missio Dei SA voortgevloei het.

Sunrise

NASKOOLSENTRUM

Tydens skoolkwartale word gemiddeld 16 tot 18 kinders van Maandag tot Vrydag by Garsfontein Laerskool opgelaai en na die kerkterrein geneem. Daar word hulle van middagete voorsien en daarna met huiswerk gehelp. Die doel van die projek is nie slegs toesig nie, maar om die kinders te help om hul skoolprestasie te verbeter.

Die funksionering van die Naskoolsentrum is afhanglik van die dienste van vrywilligers, insluitende bussiebestuurders, toesighouers en kokke. Die SunRise Naskoolsentrum bied reeds twaalf jaar lank hierdie diens aan die gemeenskap.



● Naskool Vrywilligers (2019)

Sunrise

TRAUMASENTRUM

Van Maandag tot Vrydag is daar vrywilligers aan diens by die Garsfontein-polisiestasie om misdaadslagoffers te ondersteun. Daar word ondersteuning gebied aan 27-30 slagoffers per maand, waarvan meer as die helfte slagoffers is van gesinsgeweld. Daar word fisiese ondersteuning gegee in die vorm van 'n warm stort, 'n plek om tot verhaal te kom en te rus, asook emosionele en sielkundige ondersteuning. Slagoffers word verwys na professionele mense vir verdere hulp.

Net soos in die geval van die Naskoolsentrum, is die funksionering van die Traumasentrum afhanklik van die dienste van vrywilligers. Die SunRise Traumasentrum bied reeds twaalf jaar lank hierdie diens aan die gemeenskap.

AANLYN LIEFDADIGHEIDSWINKEL

Daar is met die aanlynwinkel begin om die inkomste van SunRise aan te vul. Skenkings word ontvang van hoofsaaklik gemeenteledere. Die winkel het gereelde kopers wat veral die klere aankoop en gebruik of herverkoop in Mamelodi om 'n inkomste te verdien. Meubels, elektroniese goedere, ens. word op Facebook Marketplace adverteer.

SUNRISE COMMUNITY DEVELOPMENT PROJECT (SCDP)

SCDP was 'n inisiatief van Wapadrant-gemeente tydens die eerste maande van die Covid-19-inperking. Gedurende daardie maande is honderde duisende rande se kos ingesamel en in verskeie gemeenskappe versprei, onder ander Plastic View, Cemetery View en in die Cullinan-omgewing.

Tans word dit nie voltyds bedryf nie, maar daar is ad hoc projekte wat daaronder bedryf word.



● Kos en vrugte uitgedeel in Cullinan (2020)



● Omgeesakkies word verpak en uitgedeel (2023)



● Babaklere



● Vragte kos om uit te deel (Junie 2020)

Missio Dei

MISSIO DEI SOUTH AFRICA

MDSA is betrokke by die plaaslike Missio Dei-kleuterskool en -skool, hospice en kliniek op 'n plaas net buite Ficksburg.

Die gemeente gaan elke jaar vir die langnaweek in September Ficksburg toe om te help om die omstandighede daar te verbeter met behoeftes by elke projek.



MISSIO DEI EDUCATION

Kinders in die grondslagfase word gehelp met Wiskunde en Engels. Tans word daar by 17 skole werk geskep vir 'n administrasiebeampte, ses oorsieners en 64 ekstra klas-onderwysers. Daar word weekliks opleiding en dissipelskap aangebied vir elke onderwyser. Daar word daagliks ongeveer 945 kinders gehelp met Wiskunde en Engels. In die skool op die plaas word daar ook kinders van gr R tot gr 7 gehelp met al die vakke wat op laerskool aangebied word.

In 2022 kon MDE help om 4 leergestremde leerders se jaarlikse skool- en koshuisfooie te betaal en 3 hoërskoolleerders se skoolfooie.



Ander projekte

TRAINING OF PASTORS IN AFRICA (TOPIA)

Wapadrand is een van die sturende gemeentes van ds. Johannes Aucamp en dra maandeliks 'n bedrag van R6 600 by tot die projek. Andersins is ons betrokkenheid redelik beperk, behalwe dat ons hul vergaderings bywoon en gereeld terugvoer kry oor Johannes se bedrywighede.



RAINBOW CHRISTIAN FELLOWSHIP

Wapadrand dra maandeliks finansieel by tot die werk wat ds. Malwande Mdonga doen en hulle kom bymekaar in die markiestent op die kerkterrein.



CYFERSKUYL, HAMMANSKRAAL

Wapadrant dra maandeliks finansieel by tot die werk wat ds. David Makananise in Cyferskuyl doen.

BURUNDI MISSION COLLEGE

Tans dra Wapadrant nie meer finansieel by tot hierdie projek nie, maar skenkings wat onder ander van Wierdapark, Stellenbosch en Potchefstroom-Oos ontvang word, word in Wapadrant se bankrekening inbetaal en van tyd tot tyd oorbetaal aan ds. Ruben Safari in Burundi.



VERSKEIE KLEINGROEPPROJEKTE

Kleingroepe is by verskeie projekte betrokke, onder ander El Pida Dienssentrum, Paul Jungnickeltehuis, Botswana Sendinggroep, Danville Kosprojek en Huis Ebenhaezer Kinderhuis.


Neem-en-deel-Bybelprojek

Vanaf WPR se ontstaan was die uitreik na mekaar en na buite met die Woord van God deel van ons leefwyse. Binne die konteks is verskeie projekte en aksies deur WPR onderneem om sodanige uitreike te doen en te ondersteun. Een so 'n projek is die Neem-en-Deel Bybelprojek wat nou reeds, met dank en eer aan die Here, vir meer as 12 jaar in WPR bestaan. Gedurende die tyd het die Here die projek baie geseën. Met groot dankbaarheid aan ons Here kan vertel word dat meer as 7000 Bybels reeds geneem en gedeel is via die projek.



Die projek het ook verder gehelp om WPR lidmate aan te moedig en te herinner aan die belangrikheid en nodigheid van Bybelverspreiding as deel van die verkondiging van die Evangelie (Goeie Nuus) aan almal. Die basiese benadering van die projek is om Bybels "gratis" aan WPR lidmate, aan WPR projekte, aan kleingroepe, aan WPR jeug, en aan WPR besoekers beskikbaar te stel om die Bybels te neem en dan verder te deel. Een van die doelwitte was dat tekort aan geld nie Bybelverspreiding moet beperk nie.

Die aantal Bybels wat so geneem en gedeel is sedert 2012 tot nou toe kan in die grafiek hieronder gesien word. Befondsing van die Neem-en-Deel projek het geskied deur spesifieke WPR kollekte, algemene donasies van lidmate asook vrywillige donasies van die wat die Bybels geneem het om dit verder te deel.



Parallel met die Neem-en-Deel Bybelprojek het WPR ook 'n Borg-'n-Bybel projek, wat geïnisieer was deur die Bybelgenootskap, ook in WPR geloods. Die projek het behels dat houertjies waarin 20 x R5 munte ingesit kan word, aan die gemeente uitgedeel is om vol te maak en dan weer terug te bring. Die geld wat so ingesamel was, is dan direk aan die Bybelgenootskap oorbetaal. Ons het twee sulke fondsinsamelings gehad. Die fondsinsameling was baie geseënd en almal groot en klein, oud en jonk gesinne en individue asook die jeuggroepe het baie geesdriftig deelgeneem (kyk foto hieronder).

Die "Neem-en-Deel" Bybelprojek asook die "Borg-'n-Bybel" projek gaan DV nog voort en binnekort sal meer besonderhede gedeel word. Hou die nuusborde, Bybelrak en WPR webbladsy dop.

Die WPR fokusareas, onder ander "Leef en Vertel", is nog steeds deel van WPR se lewenswyse. Met die Stadbouersinisiatief het die Here vir ons verdere rigting, insig, energie en geesdrif gegee om as hemelburgers te "Leef en Vertel".

Dit is met groot dankbaarheid en eer aan ons Here dat ons die wonderlike mylpaal van 40 jaar van uitreik, gemeenskap, geloofsgroei en bo alles, 40 jaar van daaglikse toewyding aan God en sy koninkryk kan vier. Dit is ons bede dat die WPR gemeente 'n kandelaar/lamp sal wees en bly wat deur Christus gebruik kan word tot sy eer en om sy wil hier op aarde uit te voer.



WAPADWIELE



KARAVAAN EN TENTBEWONERS VAN GEMEENTE

Sedert die ontstaan van Wapadrant 40 jaar gelede, was daar nie net klem op die geestelike lewe van die gemeente gelê nie, maar ook op die sosiale interaksie van die gemeente.

Een van die baie sosiale interaksies was die gemeentekampe. Die gemeentekampe het nie net die chalet-bewoners geakkommodeer nie, maar ook die tent- en karavaan-bewoners.

Voortvloeiend uit die gemeentekampe het daar n behoefte ontstaan van 'n eie woonwaklub. So ontstaan die Wapadwiele. Gedurende Mei 1998 vind die eerste Wapadwiele plaas te Bukane naby Nylstroom. Wapadwiele was vir n hele aantal jare aktief. Dit is onseker wanneer die laaste Wapadwiele-kamp was.

In 2002 met die begin van die kleingroepe het van die kleingroepe spontaan begin om afsonderlike sosiale interaksies te loots. So het kleingroep GO07 al meer as 23 keer saam gekamp.

Kerkkampe was nie net mooiweer-kampe nie maar ook te midde van baie reën (Kokoriba) en bye (Utopia). Die karavaners by Utopia wou nie te ver van die chalet-bewoners kamp nie en met die bestuur se goedkeuring is daar naby die chalets gekamp. Die probleem aan die einde van die naweek was om die karavane teen die steil bult uit te kry. Die oord het toe goedgunstelik hulle trekker beskikbaar gestel om voertuie teen die bult uit te help.

Die geestelike lewe het nie uitgebly nie. So was 'n naweek van Bybelstudie gereël by die Kasteel (iewers in die omgewing van Dinokeng-Suid). Baie van Wapadrant se sosiale lewe is ook deur COVID beïnvloed. Daar het weer 'n behoefte aan 'n gemeentekamp ontstaan. Daarom word weer 'n kamp gereël vir die naweek van 15 tot 17 September 2023 by Kruger Ranch naby Magaliesburg.

Jan Meyburgh

WAPADWIELE



DESTYDSE Susters



Na 40 jaar dink ek baie terug aan soveel gebeure in die gemeente, maar veral wat die vroue betref. Nadat ons as Wapadrant op ons eie bene moes staan is daar met groot ywer begin organiseer om die Susters se aktiwiteite te koördineer. Hierin het Susan Heystek 'n groot rol gespeel.

Ons het 'n groot persentasie jong egpare en enkellopendes gehad en dit was so lekker om saam te kuier, te leer en te werk.

Ek onthou interessante onderwerpe wat ons toegerus het: "Hoe leer ek my kind bid", "Jews for Jesus", "Die Joodse Pasga" . Sprekers soos ds. Ben de Klerk, Theuns Elof, Prof. Tjaart van der Walt, tannie Leona Venter. Wie onthou nog vir Ivy Sutton?

Ontbyte is gereel vir die "Broeders" ; Lente- en Herfs-teetafels is swierig gedeck met uithaler tuisgebak; onthale vir die Seniors (daar was maar 'n klein groepie vergeleke met vandag).

Ons het hard gewerk om fondse in te samel met verskeie funksies. Een van die grootste funksies was die Saamtrek van Susters wat ons gereel het vir 'n groep van 800 vroue. Dit was 'n groot uitdaging en in die proses het die amfiteater toe ook 'n dak gekry wat bygedra het tot die sukses van 'n spesiale dag.

Dit was kosbare tye en elkeen wat betrokke was sal nog baie ander herinneringe kan aanvul.

Inkele du Prey



JEUGBEDIENING terugblik

Die eerste 15 jaar was die Jeugbediening van die gemeente gekenmerk deur al die kampe en ander sosiale byeenkomste wat vir die jeug gereël is. Dit was dus losstaande van die Kategese. In so 'n mate dat daar 'n aparte komitee was net vir Kategese, wat gekyk het na hierdie element van 'n kind se geestelike groei en so ook net daaroor gerapporteer het aan die Kerkraad. Die Jeugkomitee in daardie jare was dus net verantwoordelik vir die res, wat ook nie as verpligtend gesien is vir die jeug om by te woon nie. In hierdie tydperk het dit hoofsaaklik bestaan uit ouers wat 'n passie hiervoor gehad het wat dit saam met die jeugleiers, wat weer hoofsaaklik studente was, gedoen het. So begin hulle toe werk aan 'n beleid vir Jeugbediening. Een van die uitvloeisels daarvan was dat hulle die kerkraad oortuig het om 'n Jeugwerker aan te stel. In 1997 word proponent Willie Engelbrecht aangestel. Hy kry egter binne 6 maande 'n beroep na GK Edenvale om 'n volwaardige predikant elders te kon wees, wat hy aanvaar het. Hierna word Gawie Jooste toe in 1998 aangestel as die volgende Jeugwerker.

Hierdie bg. beleid het soos volg gelyk en is in 2001 deur die kerkraad goedgekeur:

Visie: Dat ons jeug voluit Kinders van God is.

Doelstellings:

1. Om voluit kind van God te wees in die:
 - Gemeente
 - Ouerhuis
 - Skool
 - Samelewing
2. Om as kind in verhouding met God te groei.
3. Om die onderlinge verhoudings met mekaar te versterk.
4. Om diensgerig te wees.

Die volgende fase waardeur die Jeugbediening gegaan het, is toe daar tot die besef gekom is dat Kategese en Jeugbediening saam gevoeg moet word onder een sambrel, wat dieselfde doel nastreef. Die kerkraad het dit toe ook so goedgekeur en word dit tot vandag toe nog as een bediening gesien onder die Jeugkomitee, wat ook later die Jeugdiensgroep genoem was.

Die eerste groot klemverskuiwing wat gekom het, uit heelwat navorsing en beplanning in hierdie bediening, was die onderskeid tussen programgedrewe en verhoudingsgedrewe Jeugbediening, wat soos volg onderskei was:

By programgerigte jeugbediening is die program primêr en die mens sekondêr.
(Die programme word suksesvol georganiseer en aangebied, dan gaan almal uitmekaar tot 'n volgende geleentheid en dan hoop ons die jeug daag weer op.)

Jeugbediening terugblik

By verhoudingsgerigte jeugbediening is die program sekondêr en die mens primêr.

(Dit is 'n aaneenlopende proses met geen begin of einde nie en 80 % van die bediening vind plaas voor en na die aanbieding van programme. Dit is 'n ingesteldheid wat fokus op verhoudings tussen almal wat met die jeug werk en tussen die jeug self. Hiermee saam is ook gefokus op die geestelike verhouding met God.)

Hierdie het 'n heel nuwe benadering en paradigmakuif gebring in die manier hoe jeugbediening aangepak en beplan is daardie jare.

'n Volgende fase wat die Jeugbediening betree het, was om weer na die uitkomste te kyk van die Visie en die Doelstellings van Jeugbediening. Na heelwat studie en strategiese beplanning word die volgende beleidsuiteensetting aan die kerkraad voorgelê en so goedgekeur:

Visie: Om al die jeug te lei op die pad na geestelike volwassenheid.

Doelwitte:

1. Om die jeug toe te rus.
2. Om die jeug te laat omgee.
3. Om die jeug te laat dien.
4. Geleenthede te skep vir sang en gebede.
5. Om die ouers toe te rus.

(Natuurlik elkeen van bg. weer met heelwat onderafdelings en bedieningsgeleenthede)

Hierna kom die jeugkomitee tot die besef dat die jeug van die gemeente hulle eie geestelike, emosionele en sosiale behoeftes het volgens spesifieke ouerdomme en ontwikkelingsfases waarin hulle, hulself bevind. Vir die doel word die Jeugbediening onderverdeel met elkeen 'n eie komitee en spesifieke gerigte fokus, op die volgende groepe: Voor-, Laer-, Hoër-, en Naskool (2004).

Omdat die fokus van Jeugbediening so uitgebrei het, het dit ook die volgende fase betree. Nog personeellede sou hiervoor benodig sou word en Ilda van der Merwe is in 2007 aangestel as die eerste Administratiewe beampete en Voorskool se Jeugwerker. In 2009 word hierdie pos geskei en doen Ilda net Voorskoolbediening en word Mariaan van der Walt vanaf 2009 tot 2010 aangestel as die Adminbeampete. So ontstaan daar toe ook 'n meer volwaardige bediening vir die voorskoolse jeug. (Voor dit was dit meer as 'n oppasdiens tydens die eredienste beskou.)

Die sukses van 'n Jeugwerker wat op 'n spesifieke groep fokus, het die volgende fase ingelei waarna die jeugbediening begin streef het en so word die volgende jeugwerkers oor 'n tydperk by elk van die onderskeie groepe aangestel:

Voorskool: Ilda vd Merwe (2007 tot 2010), Collette Nienaber (2011 tot 2013)

Laerskool: Lynette Coetzer (2007), Carien Human (2008-2010), Elené Maree (2010-2011)

Hoër- en Naskool: Chris de Beer (2008), Pierre Engelbrecht (2009-2012), Herman Klopper (2012-2013)

Jeugbediening terugblik

In hierdie bloei- en vooruitgangtydperk het Grawie Jooste 'n nuwe rol begin vertolk van Direkteur: Jeugbediening, maar die Kerkraad besluit om vir hom in 2011 'n nuwe pos aan te bied nl. Registrateur van die gemeente, wat hy tot vandag toe beklee.

Die gemeente gaan egter hierna deur groot finansiële druk en nie een van die Jeugbedieningposte word weer gevul nie. In 2013 word Errol Mears aangestel as die oorkoepelende Jeugwerker van die gemeente se Jeugbediening, wat hy tot vandag toe nog beklee.

In hier tydperk vanaf 2012 gaan die jeugbediening deur 'n verandering. Die Jeugdiensgroep en die Kerkraad, het na deeglike studie tot die besef gekom, dat die ouers 'n baie groot rol in die geestelike groei van die Jeug speel en vir dié doel word die bediening verander om bekend te staan as Gesins- en Jeugbediening. Vir hierdie doel het die kerkraad 'n predikant hiervoor beroep.

Die Jeugbediening, in geheel, het moontlik deur hierdie veranderings, skade gekry deurdat dit teruggekeer het na 'n "Katkisasiemodel". Gelukkig is daar nou weer 'n klomp ywerige ouers wat saam met die Jeugbedieningdiensgroep weer begin kyk het na die uitkomste daarvan en om dit weer 'n suksesvolle en volwaardige bediening te maak. Een van die uitvloeisels daarvan wat die kerkraad goedgekeur het, is dat die volgende voltydse predikant wat beroep gaan word, se hooffokus jeugbediening sal wees. Ons almal sien uit om hierdie nuwe rigtings/veranderings waar te neem in die toekoms en ons wens almal betrokke daarby alle sukses toe daarmee.



Jeugbediening

Gereeld hoor ons: "Wat van ons kinders: hoe gaan ons hulle voorberei vir wat voorlê?" By Wapadrant het ons ook oor die jare saam met ons ouers en personeel hieroor gedroom en saam kragte ingespan. Met 'n dinamiese span kinders en jongmense in Wapadrant het ons deur die jare verskeie Jeugwerk modelle gevolg wat telkens gepas was vir die tydgleuf waarin ons ons bevind het. Kleuterkerk, Laerskool- en Hoërskool-dienste en byeenkomste word gehou.





Daar word gefokus om op hulle behoeftes ingeskakel te bly, maar die hoofdoel is om hulle voor te berei om deel van die gemeente te wees en saam met ons op God se pad te wees, om so hulle plek in die samelewing en wêreld te kan volstaan.

Kleingroepe (kategese), uitreike, kampe, staptoere, jeugaande en verskeie geleenthede was aangebied en word nog steeds aangebied om so te help om hulle te bemagtig dat hulle vas en sterk kan staan in 'n deurmekaar wêreld.

Gister, vandag en die toekoms in.

Seniors

DESTYDSE UITSTAPPIES



Ek en Jean het van Middelburg (Tvl) na Pretoria verhuis in Januarie 1987 en so land ons in Wapadrant-gemeente. In 1989 het ek dr. Klasie genader en gesê ek wil vir die kerk werk, maar met seniors.

Ons het 'n Bybelstudie-/omgeegroep gevorm aan huis van Magda Coetzee met so ses lede. Later het ons verskuif na Mooigleë-Oord se saal, so 'n groepie van 15 en daarna na ons kerkgebou. Nou het die groep aangegroei tot nagenoeg 90 lede (sommige uit ander kerke).

In 1991 begin ons senior-vakansies, Zimbabwe was die eerste een. Wat 'n ondervinding! Daarna is WPR se seniors elke jaar gereed vir die vakansie van die jaar!! In die vroeë mōre staan ons dankbaar en bly en vra die Here se seën vir die langpad se ry na Môreson (460km, 3km van Tshipise).

Klasie was Priester en hy bestuur die VW-kombi (1976-model?) wat ons "Genade" gedoop het. Ander ry met hul eie motors.

Die vakansies het tot die jaar 2000 aangehou, en ons het altyd soveel pret gehad, poete gebak, konsert gehou, jukskei gespeel, geswem in warm water, lekker geëet. My staatmakers was Hettie Coetze, Fineke Silvis en Annemarie de Waard.

Die hoogtepunt van elke dag was as ons saam stil word voor die Heer, om te hoor wat sy Woord vir ons wil sê, om Hom te loof en Hom lief te mag hê. Dan sien ons uit na Sondag se diens tot sy eer. Maandag was dit die groot oppak en weer terug huistoe.

Die vakansies het opgehou, maar deur die genade van die Here gaan die Bybelstudie nog voort op 'n Dinsdagoggend. Met dankbare hart wil ek al die predikante wat ons deur die jare voorgegaan het baie dankie sê vir hul oofferinge. Tans staan Sonia Röhrs en paar helpers aan die leiding.

Al die eer aan ons Skepper vir sy groot Genade.
Sarie Aucamp

Seniors

UITSTAPPIES & FUNKSIES

MUSTANG

Sally's

Die Seniors het heerlik saamgekuier by Mustang Sally's in 2018.



PASGA

maaltyd

In 2023 bied El-pida-dienssentrum 'n Pasgamaaltyd aan. Wat 'n besonderse geleentheid was dit nie!



YSBEER

Piekniek

Nie eens die winter kan die gesellige saamkuier stuit nie! Dié geleentheid is in Junie 2019 aangebied.



100ste verjaarsdag



Ben Buys

Op 15 Augustus 2017 vier Ben Buys sy 100ste verjaarsdag! Hierdie merkwaardige wiskundige en vriend het diep spore in ons harte getrap. Ben behaal sy oorwinnaarskroon op 2 Julie 2022 op 105-jarige leeftyd.



Susan vd Westhuizen

Op 30 Mei 2023 vier Susan van der Westhuizen haar 100ste verjaarsdag! Sy is die toonbeeld van positiwiteit en is opgewonde oor elke dag van die lewe.

Wapadrant se Pyporrel



Inwydingskonsert

Die pyporrel van die Wapadrant Gereformeerde Kerk is in 2022 vervang met 'n pragtige pyporrel met Hans Admiraal as orrelbouer. Die instrument is oorspronklik in 1973 opgerig in die NG Gemeente Riebeeckpark te Kemptonpark deur die Suid-Afrikaanse Orrelbouers. Willem Mathlener was die orreladviseur.

Op 27 Februarie 2022 het ons almal gedeel in ons dankbaarheid om die koning van instrumente weer te laat opklink in die kerkgebou. Dié drie-manuaal-orrel, gedoop Jantjie, beskik oor 28 registers. Ons kon luister na die stewige prestante, soet fluite, prominente vulstemme en triomfantelike tongwerke met basuin, hobo, regaal en trompette.

Prof. Albert Troskie, 'n emeritus-professor in musiek en voormalige hoof van die musiekkdepartement aan die Universiteit van Port Elizabeth, het die ryk palet van die orrel se klankkleure gedemonstreer.



● Prof Troskie, Hans Admiraal en Stephan Geyer (orrelis)



● Jantjie se orrelpype

Vorige en huidige personeel

*vetgedruk is die huidige personeel




Agenbach, Deon	Orrelis
Aucamp, Helena	Adminbeampte / Kantoorbestuurder
Aucamp, Jean	Saakgelastigde
Buyt, Jana	Musiekleier
Curtin, George	Musiekleier
Daniel, Esmé	Uitreikkoördineerder
Davel, Wilhelm	Musiekleier
De Beer, Chris	Jeugwerker
De Jager, Kotie	Predikant
Doubell, Hannelee	Orrelis
Du Plessis, Anlia	Uitreikkoördineerder
Engelbrecht, Wimpie	Jeugwerker
Engelbrecht, Pierre	Jeugwerker
Enoch Fenyane	Algemene werker
Hattingh, Florence	Uitreikkoördineerder
Heystek, Klasie	Predikant
Hugo, Irene	Koster
Human, Carien	Jeugwerker
Geyer, Stephan	Musiekleier / Orrelis
Glass, Anneke	Musiekleier
Grove, Petrus (Sloet)	Sendeling Predikant
Jooste, Grawie	Jeugwerker/Direkteur JB/Registrateur/Skriba
Kloppers, Herman	Jeugwerker
Knoetse, Dirk	Klank
Kruger, Andries	Predikant
Kruger, Engelette	Musiekleier
Kruger, Jaco	Predikant
Leeuwner, Renie	Kantoor-adminbeampte
Leuschner, Wilhelm	Predikant
Luiten, Willem	Orrelis
Maree, Elené	Jeugwerker
Mears, Errol	Jeugwerker
Masilela, Koos	Algemene werker
Mbonani, Johannes	Predikant

Vorige en huidige personeel

*vetgedruk is die huidige personeel



Mdonga, Malwande	Predikant
Minnaar, Elmarie	Kleingroepekoördineerder
Moilakgotla, Isaac	Algemene werker
Mtsweni, Joyce	Skoonmaker
Nel, Rina	Saakgelastigde
Nienaber, Collette	Jeugwerker
Nkhumishe, Seni	Opsigter / Pakhuisadministrasie
Martha Ntuli	Skoonmaker
Pollard, Anja	Musiekkleier
Sammuel	Algemene werker
Schoeman, Doreen	Uitreikkoördineerder / Kommunikasie
Seanego, Jacob	Algemene werker
Sithole, Patric	Algemene Werker
Smit, Alna	Musiekkleier / Musiekdirekteur
Smit, Rassie	Predikant
Smit, Pieter	Skriba
Tollig, Jan	Kleingroepekoördineerder
Van Blerk, Theo	Predikant
Van der Merwe, Dirk	Klank
Van der Merwe, Ilda	Admin / Jeugwerker (vorige jare)
Van der Walt, Elsemarie	Musiekkleier
Van der Walt, Mariaan	Jeugbediening - Admin
Van der Walt, Tjaart	Predikant
Van Wyk, Agnes	Skoonmaker
Venter, Frikkie	Diakoniekoördineeder
Venter, Renchia	Musiekkleier
Vermeulen, Hanani	Musiekkleier
Vermeulen, Okkie	Orrelis
Vermeulen, Peet	Predikant
Viljoen, Waldo	Klank
Vorster, Maritha	Kommunikasie
Vorster, Riaan	Musiek direkteur / Orrelis





Redaksie

Wapadrant kerkkantoor

www.wapadrant.co.za

kantoor@gkwapadrant.co.za



Soli Gratia